





大明仁孝皇后勸善書卷之十一

嘉言

○惟德動天。無遠弗届。○德無常師。主善為師。○君子成人之美。不成人之惡。○已所不欲。勿施於人。○有德則樂。樂則能久。○為善者不改其度。故能有濟也。○善者因禍而為福。○有陰德者。必饗其樂。以及子孫。○為善最樂。○仁勝凶邪。德除不祥。○瑞生必於嘉士。福至實由善人。○積土成山。風雨興焉。積水成淵。蛟龍生焉。積善成德。神明自得。聖心循焉。○聲無小而不聞。行無隱而不彰。玉在山而木潤。淵生珠而崖不枯。為善不積耶。安有不聞者乎。○君子務脩其內。而讓之於外。務積德於身。而處之以導道。如是。則貴名起之如日月。天下應之如雷霆。○有陰德者。必有陽報。○德善日積。則福祿日臻。○救災恤隣。道也。行道有福。○體道合德。享鬼神之福祐。○為善不求人知者。謂之陰德。故其施廣。其惠博。天報必豐也。○有陰德者。其後必大。○為人作善方便者。其後受惠。○積金以遺子孫。子孫未必能守。積書以遺子孫。子孫未必能讀。不如積陰德於冥冥之中。

以為子孫長久之計○但存方寸地。留與子孫耕。

○陰施陽報。弘廣無量○造善於陰。德報於顯○處心正直。積累陰功。感動穹昊○給濟貧病。撫恤孤惻。常以仁恕居懷。恒將惠愛為念○信善作福。積善不厭。信知陰德。久而必彰○見諸病人。施其湯藥。令離病苦。命終生欲境天○立德闇昧之中。而慶彰萬物之上○若見一切病人。常應供養。如佛無異。八福田中。看病福田。是為第一○開通道路。興置橋梁。一念善因。受天人之快樂。證佛祖之真源○曠路作好井。橋船度人民。功德日夜增。常生天人中○日日行方便。時時發善心○有心無相。相逐心生。有相無心。相随心滅。

○人有一善。百神俱泰。人有十善。司命諸筭。人有百善。東華注名。人有千善。福及七祖。萬善既備。白日登宸○天上人間。方便第一○皇天不負好心人○慈為萬善之本。心若不慈。善何以立○有德行者。必有昭名○在世積善。長行陰陽者。鬼神敬之。五福隨之○若人積善。天神扶衛。魂超福境○陰功可延其壽。吉人依舊無凶○若非積行施陰德。動有群魔作障。

緣○於力到處種種方便則陰德無量而受報如之矣○隨時應物行方便縱犯凶星亦不虞○以慈悲為本觀一切物常行不忍世人痛苦如在我身常行慈悲心自成無上道○非積善陰德不足以感神○善濟物而不以為德○重積德則無不克○儲勲夙世累行昨生故得玉府登庸瓊宮簡錄○陰濟良善則有福報○汝欲登科須憑陰德○有陰德者徑補仙官○學道者廣行陰德救人危難○與人方便自己方便○積道德者天與之地助之神輔之○人能刻意為善靜與道合動與福會○所謂善人皆敬之天道佑之福祿隨之衆邪遠之。

感應

楚孫豺敖為兒出遊而還憂而不食其母問故豺敖泣而對曰人言見兩頭蛇者必死兒今日見之恐死無日矣母曰蛇今安在曰恐他人又見之已埋之矣母曰無憂汝不死矣吾聞之有陰德者必有陽報德勝不祥仁除百禍天之靈高而聽卑爾必興於楚及長為楚令尹以老終。

漢王恠詣京師於空舍中見一書生謂我當到洛陽而病命在須臾腰下

有金十斤。願以相贈。乞藏骸骨。未及問姓名而命絕。忱驚。金一斤。營殯。餘金悉置棺下。人無知者。後歸數年。縣署忱亭長。初到日。有馬馳入庭中而止。大風飄一繡被墮忱前。即言於縣。縣以歸忱。後乘馬到洛陽。馬奔走牽入他舍。主人見之。喜曰。今擒盜矣。忱具說其狀。主人曰。卿何陰德致此。忱因說葬書生事。主人驚。號曰。是吾子也。姓金。名彥。大恩久不報。天以此彰卿德耳。厚遺忱。忱辭讓而去。由是顯名。舉茂才。除郿令。子孫皆顯于時。

後漢弘農楊寶。名士也。性慈愛。年九歲。至華陰山北。見一黃雀。為鷗梟所搏。墮地下。為螻蟻所困。即懷之。安置梁上。又被蛇虵所齧。乃移巾箱中。采黃花飴之。毛羽既成。朝去暮來。積年之後。忽與羣雀俱來。哀鳴遶寶。數日乃去。是夕三更。寶讀書未卧。忽見有一童子。向寶再拜曰。我是西王母使者。往蓬萊過此。為鷗梟所搏。君仁愛拯救。數承恩養。實感恩惠。今當受使南海。不得朝夕奉侍。流涕辭別。以白環四枚與寶。曰。令君子孫潔白。位登三公。後當如此白環矣。於是遂別。寶既孝聞天下。名位通顯。生子震。震生秉。秉生賜。賜生虎。四世三公。為京師盛族。果應白環之數。天下無比。及楊

震墓有大鳥隨之時人以為貞孝所招陳留蔡伯喈獨立論云是黃雀感恩而致也

唐中書令晉國公裴度質狀眇小相不入貴既屢屈名場頗亦自惑會有相工在洛中大為縉紳所神公特造問命相工曰郎君形神稍異於人不入相若不至貴即當餓死今則殊未見貴處可別日垂訪為郎君細看公然之他日出遊香山寺徘徊於廊廡間忽見一素衣婦人置緹褶於僧伽和尚欄檻之上祈祝良久瞻拜而去少頃度方見緹褶在舊處知其遺忘也又料其追付不及遂收取以待婦人再至日暮竟不至度挈婦過旅謁旦復携往寺門始闢覩昨日素衣疾趨而至撫聲惋歎若有非橫度從而訊之婦人曰阿父無罪被繫昨告人假得玉帶二犀帶一直千餘緡以賂津要不幸去失於此今老父不測之禍無所逃矣度憮然復細詰其物色曰而授之婦人拜泣請留其一度笑而遣之尋詣相者審度聲色頗異驚歎曰此必有陰德及物前途萬里非某所知也度因以前事告之相者曰是已度後果位極人臣

宋成都運使李之純。專以掩骼埋胔為念。吏人徐熙。專為宣力。計其所藏。無慮萬計。一日金華街王生死復甦。云見冥官曰。爾以誤追。今當還人間。陰司事雖禁泄露。然為善之效。亦欲人知。李之純葬枯骨有勞。與知成都府一任。徐熙督役有勞。與一子及第。汝宜傳於世間。後皆如其言。

宋李謙。嘗值歲歉。出粟千石以貸鄉人。明年又歉。人無以償。公即對眾焚券曰。債已償矣。不須復償。明年大熟。人爭償之。一無所受。明年又大歉。公竭家資煮粥以濟之。動以萬計。死者復為瘞之人。皆曰。子陰德可謂大矣。公曰。何足為德。一日假寐。夢有紫衣人告之曰。上帝知汝有德及人。報在爾後。言訖而去。後謙壽百歲而終。子孫皆為顯官。

宋韓魏公在政府時。以三十萬錢買女妓張氏。姿色甚麗。券成。張忽泫然。公問其故。張謝以良家子也。流落至此。不覺墮淚。公曰。爾初不以實告。吾無用尔。命焚券。且逐去。張惶怖。遽吐其情。妾借職郭守義妻也。守義前歲官湖南。部使者挾私。劾以敗官。今秋高歲晚。實恐盡室餓死。京師。願身役于人。以活守義兒女。公惻然憫之。乃留券。遣張持三十萬錢還舍。且令語

守義敗官果非辜。可訴之朝。事白。汝却歸我家。張欣然而去。郭後得辭雪。且得調淮右。見闕。張來如約。公不使至前。遣人謂吾位宰相。豈可妾士人妻。向者緡錢費用應盡。取前日券包金二十星助汝之官。善視郭氏兒女。張不得見。望門涕泗。感激百拜而去。人咸謂公之隱德如此者甚多。後公薨。贈尚書令。謚忠獻。配享英宗廟廷。復贈魏王子五人。忠彥繼登相位。端彥右贊善大夫。純彥官至徽猷閣直學士。粹彥為吏部侍郎。拜龍圖閣學士。嘉彥尚神宗女齊國公主。拜駙馬都尉。終瀛海軍承宣使。其孫在徽宗時亦為顯官。隱德之報。豈不信哉。

宋馮京字當世。鄂州咸寧人。其父商壯歲無子。將如京師。其妻授以白金數笏。曰。君未有子。可以此為買妾之資。及至京師。買一妾。立券償錢矣。問妾所自來。涕泣不肯言。因問之。乃言其父有官。因綱運欠折。鬻妾以為陪償之計。遂惻然不忍。犯還。其父不索其錢。及歸。妻問買妾安在。具告以故。妻曰。君用心如此。何患無子。居數月。妻有娠。將誕。里人皆夢鼓吹喧闐。迎狀元至馮家。次早生京。喜讀書。領舉為解元。省試為省元。登第為狀元。

世號為馮三元。

宋鍾離瑾開寶間宰江州之德化。明年將以女歸許氏。一日諭其胥魁俾市婢以送女。翌日胥與老嫗引一女子來。問其何許人。嫗曰。撫之臨川人也。幼喪其親。外氏育之。女受嫗戒。亦不敢有他言。君視事少間。婦過于屏。是女流涕有戚容。疑其家詬。詰之曰。不然。某之父昔曾令是邑。不幸與母俱喪。無親戚以為依。時方五歲。育於胥家十年矣。且將為已女。今明府欲得媵妾。胥與嫗以其應命。適見明府視事。追感吾父。不覺涕零。君大驚。呼胥嫗以審之。果如女言。誠家人易其衣服。養之如已所生。以書抵許氏。告緩期。姑將輟。吾女之貧。以嫁焉。許亦惻然。復曰。君侯獨能抑已女而拔人之孤女。予固有季子。願得以為婦。安事盛飾哉。卒以二女歸許氏。久之君夢一綠衣丈夫造庭拜而謝曰。不圖賤息辱賜於君。今得請於帝。奉十任有土官。故來致命。後果歷十郡太守。終於江淮發運使。後鍾離氏有仕籍于朝者。常十餘。皆出君之裔。故世為冠族。

宋魯曾公公亮布衣遊京師。舍於市側。聞旁舍泣聲甚悲。詰朝過而問之。

旁舍生欲言而色愧。公曰。若第言之。或遇仁者。戚然動心。免若於難。旁舍生顧視左右久之。曰。僕頃官于某。以某事用官錢若干。吏替之且急。視家無以償之。乃謀於妻。以女鬻於商人。得錢四十萬。行與父母訣。此所以泣也。公曰。商人轉徙不常。且無義。愛弛色衰。則棄為溝中瘠矣。吾士人也。孰若與我。旁舍生曰。以女與君。不獲一錢。猶愈於商人數倍。然僕已書券納直。不可追矣。公曰。第償其直。索其券。彼不可。則訟于官。公即與四十萬錢。約後三日。以其女來俟吾於水門之外。旁舍生如教。商人果不爭。携女至期以往。則公之舟行已三日矣。其女後嫁為士人妻。公後果登相位。公未顯時。嘗夢人謂公有陰德。必獲厚報。竟如其言。

宋馬洧。其父以中年無子。因置一妾。極姝麗。每理髮。見公必引避。如有沮喪之狀。公恠問之。則曰。某父本守某官。不幸死去。家甚遠。無力可歸。故至鬻鬻某。今猶未經卒哭。約髮者實素帛。暫以絳綵蒙其上。不欲公見。初無他也。公為惻然。即日訪尋其母還之。且厚有資助。是夕公夢一羽衣曰。天錫爾子。慶流洧洧。明年果生一子。因以洧字名之。即巨濟也。及長。赴試羽

衣復入夢曰。汝欲及第。須中三魁。既而魁太學。魁鄉薦。乃至唱名為天下第一。屈指果中三魁。

宋張忠定公詠。號乖崖。任成都時。嘗夢謁紫府真君。接語未久。忽吏報請到西門黃兼濟承事。兼濟以幅巾道而趨。真君降階接之。禮頗隆。且揖張坐承事之下。顧語詳款。似有欽歎之意。公翌旦即遣人詣西門外。請黃承事者。戒令以常所衣服來。比至。果如夢中所見。公即以所夢告之。問平日有何陰德。蒙真君厚遇如此。且居某之上坐耶。黃云。無他長。唯每歲遇米麥熟時。以錢三萬緡收糶。至明年米麥未熟。小民艱食之際。糶之價直不增。升斗不易。在我者初無所損。而細民得濟所急。公曰。此承事所以坐某之上也。

宋陳元植者。粗有家道。而好行陰騭。至於禽蟲悉蒙其惠。每將食於高原之上。百鳥遙見。必飛鳴前後。或來逼其坐隅。元植甚憫之。禽鳥亦不畏懼。凡如此十餘年。一夕夢有衣緋人長三尺餘。巾帶備具。謂元植曰。爾甚有陰德。及物於一切生命。皆欲濟活。然爾將來壽命短促。以此之故。須延其

壽汝唯勉之。覺後飲食加增於常。時年九十九歲。一旦晝坐。忽然袖中有一物。掇地化為着緋衣人。長三尺許。拱立於元植前。謂之曰。君壽本不逾四十。為有陰功。是以延爾之壽。今僅百歲。須歸常理。辭爾去焉。瞥然不見。元植遂與子孫述之。令選地樹墓。逾月無疾而終。

唐彭城劉弘敬。字元溥。世居淮肥間。資財數百萬。脩德不耀。人莫知之家。雖富。利人之財。不及怨。施人之惠。不望報。長慶初。有善相者。於壽春道逢元溥。曰。噫。君且止。吾有告也。元溥乃延入館而訊焉。曰。君財甚豐。然更三年。大期將至。如何。元溥曰。夫壽夭者。天也。先生其柰我何。相者曰。夫相不及德。德不及度量。君雖不壽。而德且厚。於度量又寬。夫一德可以消百災。猶享爵祿。而況於壽乎。勉而圖之。吾二載當復此來。言訖而去。元溥送之。乃為身後之計。有女將適。抵維揚。求女孥資行。用錢八十萬。得四人焉。內一人名蘭蓀者。有殊色。風骨姿態。殊不類賤。元溥詰其情。久乃對曰。賤妾死罪。無復敢言。主君既深訝之。何所潛隱。某代為名家。世本河洛。先父以卑官淮西。不幸遭吳寇跋扈。因緣姓與國同。疑為近屬。身委鋒刃。家乃

沒官。以此湮沉。無所告訴。其諸骨肉。寇平之後。悉被官軍收掠為俘。不可復知也。賤妾一身。再易其主。今不幸及此。元溥太息久之。乃言曰。夫履雖新。不加於首。冠雖舊。不踐於地。此女雖家族喪亡。實衣冠之後。不可以為婢使。遂焚其券。收為甥。以家財五十萬先其女而嫁之。長慶二年春三月。辛卯。蘭蓀既歸。是夜元溥夢一人被青衣。秉簡望塵而拜。迫之。潛然曰。余則蘭蓀之父也。謝公嫁我女。我無以報。今告天帝為君請壽。言訖而去。後三日。元溥復夢蘭蓀之父立於庭。紫衣象笏。侍衛甚嚴。前謝元溥曰。余不佞。幸得請君於帝。許延君壽二十四載。富及三代子孫。其所殘害吾家者。悉獲按理之。存者禍身沒者子孫受豐。又憫余之冤。署以重職。獲主山川於淮海之間。因嗚咽再拜而去。詰旦。元溥依依未能甚信。後二年。相者果復至。迎而賀。元溥曰。觀公之面。陰德之氣甚盛。視公眉目。可延二紀之壽。公作何陰德。元溥曰。無他。止將婢作親女嫁之。相者曰。不忍以貴為賤。此真陰德也。元溥果壽考而終。富及三代。子孫之盛。異於他族。

宋傳敬字次張。維州人。為士子時。以紹興二十年過吳江。縱步塔院。見僧

房竹軒雅潔。至彼小憩。其東室有殯宮。問為誰。僧云。頃者前知縣館客身。故聞其家在福建。無力歸窆。回權厝于此。敝惻然憐之。既還舟次。是夜夢。儒冠人持名紙來見。曰。三山陸蒼。自叙蹤跡。與僧言同。將退。拱白曰。旅魂棲泊無依。君其念我。君有德人也。故來相告。明旦敝復抵僧舍。遂傾其貲。遷葬於官地上。乃脩佛果以資助之。至七月。敝赴轉運司試。寓西湖小刹。復夢陸生來。再三致謝。且云。舉場三日。題目蒼悉知之。謹奉告。切勿宜泄。若泄之。彼此當有禍。敝寤而精思。屬藁。洎應敵。盡如其言。遂薦名高第。宋青州益都尉老舉人。云。初在鄉里。累舉不捷。乃庵居郊野。無復進取之意。一夕有盜。雨中穿窬而入。乃謂盜曰。汝冒雨夜穴壁。良苦。度汝心必不得已也。盜以實告曰。我非為盜者。其營卒也。因博輸懼軍令。不敢歸。乃來相擾。尉曰。吾有綃二疋。因取贈之。盜拜謝而去。詰旦又詣其營。為請於軍校。得不治其罪。亦不言其為盜也。次舉。知友勉令就試。猶豫間。卒又出燈下。尉曰。何復來耶。盜曰。某自前年蒙秀才恩惠。自誓死生必立効相報。今不幸歿于軍前。知秀才欲赴舉。故來。遂失所在。既而赴舉。試前盜以所

試題送出。累場皆然。悉不差謬。果獲高薦。至南省亦然。迨臨試。卒又見形。曰。內中某不敢入矣。秀才勉之。已而登第。卒又出曰。若遇益都尉。不可不受。有數人負命者在彼。至時某亦當往相助。後果尉是邑。到官未幾。有告羣盜聚某村林中者。尉忽忽率衆往捕。會馬駿獨尉與一廐吏先至其地。羣盜望見。皆俯伏就執。乃叱令廐相反接。畢而部衆始至。盜驚曰。向見馬後有甲士百餘。故不敢動。不然寧束手耶。

宋剡縣陳婺妻。少與二子寡居。好飲茶茗。以宅中有古塚。每飲先輟祠之。二子患之。曰。塚何知。徒以勞苦欲掘去之。母苦禁而止。及夜。母夢一人曰。吾止此塚三百餘年。公二子恒欲見毀。賴相保護。又鄉食吾佳茗。雖潛壞朽骨。豈忘翳棄之報。及曉。於庭內獲錢十萬。似久埋者。唯貫新。母告二子。二子慙之。從是禱酌愈至。母壽至九十餘。無疾而終。

唐羅城使程彥賓進攻遂寧之日。左右以三處女獻。皆蔚然有姿色。時公方醉。謂女子曰。汝猶吾女。安敢相犯。因手自封鎖。置于一室。及旦。訪其父母。還之。皆泣謝曰。願太守早建旌節。彥賓曰。旌節非敢望。但得死而無病。

便是好也。其後官至觀察使。年九十七。無疾而卒。諸子皆仕。人以為陰德之報。

宋時邦美陽武人。父為鄭州牙校。補軍將。吏部差押綱至成都。時已六十四歲。婦方四十餘。未有子。謂其夫曰。我有白金百兩。可携至成都。求一妾歸。冀得子為身後計。邦美父至成都。訪牙僧。見一女甚華麗。詰其家世。不對。窺見以白布總髮。恠而問之。悲泣曰。父本都下人。為州掾。卒。扶襯至此。不能歸。鬻妾欲辦裝耳。邦美父惻然。携金往見其母。以助其行。又為幹行計。同上道路中。謹事掾妻如部曲。至都下。僦居最殯。畢。方辭歸。妻迎問買妾狀。具以實告。妻曰。濟人危急。為德甚大。當更為君圖之。未幾。妻有孕。一夕夢有數人披袖櫬輿一金紫人。留堂中。及旦。生邦美。後舉進士第一。官至吏部尚書。

晉李公冰為蜀守。行部至湔山。乃曰。岷山導江。為四瀆之首。而水或為患。以害于人。作三石人以止江水。作石犀五以厭水精。鑿離堆山。分三十六江。以灌溉。於是蜀號陸海。人無水旱之憂。家有粒食之安。其後入廣漢。後城

山中遇一羽人。謂公曰。公德及民物。已注名天府矣。帝遣吾來迎公也。遂白日升仙。蜀人世祠之。

宋元祐間。嚴州清溪王氏女。名亞三。性柔惠。好行陰陽。一日見鷺母為猫所食。有未出巢鷺子三枚。每日以飯飼之。後長大飛去。其冬亞三病死。次年春三鷺復來。飛遶其屋不已。母曰。尔非尋亞三否。亞三已死。葬在後園中。欲尋則隨我去。母行鷺飛隨後。至園。母指墓示之。鷺飛鳴於墓。以觔鑽入墓土中。皆死。

魯宣公十五年。初。魏武子有嬖妾無子。武子疾。命其子顓曰。必嫁是妾。病則曰。必以為殉。及卒。顓嫁之。曰。疾病則亂。吾從其治也。及輔氏之役。獲杜回。秦之力人也。顓見老人結草以亢回。回躡而顓。故獲之。夜夢老人曰。余而所嫁婦人之父也。尔用先人之治命。余是以報。

唐侍御劉軻者。韶石人也。幼之羅浮。九疑。讀黃老之書。究輕舉之道。嘗獨處一室。數夢一人衣短褐。曰。我書生也。頃因遊學。逝於此室。以主寺僧不聞郡邑。乃瘞於北牖下。而屍骸跼促。死者從真。何以安也。若能遷葬。必有

酬謝乃詢于緇屬果然。劉君即解所着之衣覆其骸骨。具柩棺改窆於虎溪之上。是夜夢書生來謝持三雞子勸軻立食之。軻嚼一卻而吞其二焉。後乃精於儒學肄文章。因策名科第。歷任史館。

宋武弁有段邁者嘗過黃坑。從者於馬前拾取髑髏數片。中有一片其上隱隱有逃走奴字。蓋點蹤入骨也。是夕從者即夢一人以手障面從之索骨。且曰我羞甚。切急為我深藏。無令人見。我當有以報君。從者驚覺立為瘞之。他日再過黃坑復夢前索骨者告曰。鄉感君恩去此數步地下有大伏藏。聊以為謝。如教掘之。果獲金千餘兩。

唐范明府者忘其名。頗曉術數。以選授江南縣宰。自課其命云。來年秋壽祿俱盡。將出京。又訪於日者。日者曰。子來年七月數盡。胡為遠官哉。范曰。某固知之。但一女未嫁。利薄俸以資遣。及之任。買一婢子。因詰其姓氏。婢子曰。姓張。父嘗為某堰官。兵寇之亂。略賣至此。范驚起問其父名。乃曩昔之交。因謂其妻曰。故人之女。豈可使為婢。悉以女粧奩擇邑客謹厚者配之。秩滿歸京。日者見之大駭曰。子何前相給之甚。筭子祿壽俱盡。今乃

無恙。非甲子差謬。即當有陰德為報耳。范曰。俱無之。日者詰問不已。范偶以嫁女僕之事告之。日者曰。此即是矣。子之福壽未可量也。後果歷官數任而終。

唐孫泰。山陽人。少師皇甫穎。守操頗有古賢之風。泰妻。即姨之女也。先是姨老。以二女為託。曰。其長幼損一目。汝可娶其女弟。姨卒。泰娶其姊。或詰之。泰曰。其人有廢疾。非泰何適。眾皆服泰之義。嘗於都市遇鐵燈臺。買之。既磨洗。即銀也。泰往還之。中和中。將家于義興。置一別墅。用錢二百緡。既半授之矣。泰遊吳興郡。約回日當詣所止。居兩月。泰回復。以餘資授之。俾其人他徙。于時覩一老嫗。長慟數聲。泰驚悸。召詰之。嫗曰。老婦嘗追事吾姑于此。子孫不肖。今為他人所有。故悲耳。泰憫然久之。因給曰。吾適得京書。已別除官。固不可駐此也。所居且命爾子掌之。言訖而去。不復返矣。他日泰夢一神人。紫衣象簡。後容謂之曰。汝平生德行不虧。名知天府。奉帝命。宜增汝壽。而昌汝後也。汝唯勉之。泰自是愈脩陰德。壽九十而終。子展進士及第。世為顯官。

宋鄂州都統司醫官滑世昌。居于南市。家貲鉅萬。而行醫以救人為心。鄂之人咸稱其德。淳熙十四年十一月望日之夜。夢有客來訪。車騎甚都。云是城隍神王。既入坐。談話之次。言此邦明日有非常大災。民罹非命。君家亦當墮此厄中。以君平時用心慈仁。多所濟活。陰功昭著。上帝勅我救爾一家。但有資財不可得耳。滑拜謝。且伸懇禱。云若獲幸免。而資蓄蕩然。則舉家狼狽與死也。神曰。此却易辦。決不至凍餒。恍然而覺。聞樓鼓已五更。呼告其妻。妻亦夢如是。深以為憂。至旦。天大風。陡寒。滑方朝食。漢陽武八官招之視疾。及還家。已昏暮。夜未半。火作於市。滑居烈焰中。念闔門十口。無計自脫。忽有壯夫數十輩。着紫衫。排列火邊。驅家人登轎。徑昇至將臺下。相去六七里。俄風雪大作。適路有空屋。趨避于中。相看如癡。莫知所以。黎明。人轎皆不見。顧舊居已為瓦礫之場矣。撥剔埃煤中。得銀三十餘兩。始悟不至凍餒之說。夫婦兒女僕妾悉無恙。旋就宅於城中。醫道復振。會歲荒疫。凡傷寒有危證者。稍藥救療。賴以安全者。不可勝計。由是家業愈盛。子孫三世皆致大富。

宋吳五承事者。合州赤水縣人。其家頗饒於財。傳四世皆一子。專務陰德。凡可以濟衆賑貧者。無所不盡。至五承事。遂生兩男。其壻張溥。司戶勸其次子庚讀書。招邑士張坦于館舍。及赴舉。坦黜而庚預薦。將就類試。乃捐錢百千。結同舉勾龍渙。以為助。迨入類場。則兩人分坐東西廂。是歲丙子。場屋嚴肅。不得相往來。庚才思短索。窘迫無計。髣髴見坦在側。取其試卷一揮成文。凡三日皆然。遂中高等。張溥扣其所著。略不能言。溥曰。正使全出勾龍渙手。獨不稍記梗槩。以答交游問訊者乎。庚曰。與勾龍渙對廊坐。遠甚。失望。非賴張先生力。殆成曳白矣。溥感坦之德。亟往見謝。坦駭曰。坦既不發解。何由入得類場。君無戲我。俄庚亦來謝。坦恠歎其異。曰。是亡他。乃君家累世陰陽彰聞。天地神祇故以善祥相報爾。庚登科。調果州相如主簿。其後子孫皆讀書業科舉。代有顯官。

宋醫者周添佑。河北人。世以醫藥為業。人有所請。無貧富。用藥無二。一日暴卒。經宿乃蘇。仍跛其足。人恠而問之。添佑曰。始死。追詣州北崔府君廟。中府君曰。令取鏡照之。乃言爾無罪。平生多陰德。周亦不論此言。府君曰。

追爾來無他。上天遣二童子來。知爾善誦顏長官詩。爾可誦末篇。誦畢。童子即飛空而去。府君令取祿簿閱之。曰。爾尚有十五年祿。故未可死。脚已損不可行。府君命木匠取廳前樹枝使裨之。遂得歸。果十五年卒。

宋徐宗仁。西蜀人。其鄉有兩石橋夾出一江。四時皆湍急。下則深淵。惟此處可以立渡。常年溺死者甚衆。蓋舡小觸石即碎。宗仁發心造一巨舟。兩頭裹以鐵葉。自顧篙手。專一渡送往來之人。且建善緣以薦亡者。一日忽有道人登門。稱善星命。謂徐曰。公壽止三十三。徐大驚異。其年生日之時。夢至官府。見王者坐于堂上。門首濕衣之鬼。約三四百人。執一卷投于王前云。徐宗仁濟生拔死。功德莫大。乞與夫妻壽考。子孫榮貴。王者指左右以此詞示宗仁曰。君壽本當盡。為此之故。可特延三紀。覺而異之。自此益好善樂施。二子三孫皆榮貴。宗仁果逾三紀而卒。人為立祠于渡側。

宋周必太。字子充。監臨安府和劑局。局門內失火。延燒民家。逮吏獄未論報。子充問寺吏曰。假設火自官致。當得何罪。吏曰。當除籍為民。子充遂自誣服。坐失官。吏得免死。子充歸道謁婦翁。翁肅容坐定。門外雪交下。僅

子掃於庭。翁不樂。意謂妻以女為門戶計。既失官。缺前望。殊不為禮。復私訝前一夕夢掃雪迎宰相。未知為何祥也。惟子充雨雪中至。無他客。姑留之宿。子充既歸。益自刻苦讀書。試博學宏詞科。其至京師也。寓一班直家。其妻一日携小冊自外至。借觀。則鹵簿圖也。悉錄記之。及入試。果以此命題。中詞科。歷官至宰相。封益國公。先是子充試前夢入宴。見一判官。撈掠一捻胎鬼。指子充曰。此人有陰德。當位宰相。貌陋如此。柰何。鬼請為作帝王鬚。官首肯。鬼起摩子充額。為之種鬚。及覺。猶隱隱痛。數日始定。子充既罷相。私居一相士挾貴人書。見子充。適邂逅於門外。相者問相公何在。子充進揖曰。某前此待罪宰相。相者曰。何宰相貌如此。得非誑我耶。子充氣愈和。色愈溫。迺入上坐。相者復請見宰相。子充荅如初。子充起。相者亦起。將其鬚曰。帝王鬚。真宰相也。子充大驚服。厚贐之。蓋前此種鬚事。雖妻子至親。亦不以告也。

漢陳臨字子然。為蒼梧太守。有遺腹子。報父怨。捕繫獄。傷其無子。令其妻入試。遂產一男。人歌曰。蒼梧陳君恩廣大。令死罪囚有後代。德參古賢。天

報施其後子孫繁庶並登榮要果符所祝。

宋王丞相曾初任滿入京師。一日過甜水巷。聞子母二人哭甚哀。若有大憂者。因詢其隣。云其家少官逋四萬錢。計無所出。止有一女賣與遠方客。旦夕分離。無復相見之期。所以哭之哀切。公乃訪其家問之。果然。因謂其母曰。汝女可賣與我。仕宦往來時得相見。遂以白金與之。令償客。約三日取。至期不來。其母遂訪公之所館。而公已行矣。其後公大貴。位至兩府。子孫皆極榮盛。陰德之報。信有徵也。

宋南昌王知縣。一日凌晨見一婢子堂中執箒而泣。詰其故。乃云。憶舊事。不覺淚垂。因言妾陸知縣之女。父受替自此去過鄱陽湖。為劫賊所害。獨留妾一身。流轉到此。詢之縣吏。皆曰然。遂語其妻曰。仕途交代。有兄弟之契。今此妮子乃前交代之女。須與看承。擇良配嫁之。公有女許隣邑知縣之子。消日畢禮。遽書報之曰。近得前故交代之女。年已及笄。欲那展一年。收拾餘俸。以辦奩具。與女子同時出嫁。隣邑知縣報云。其有一姪年幾弱冠。請將令女奩具中分之嫁。吾子與吾姪庶成一段義事也。出嫁之夕。公

燭下視事。忽見一人朝服拜於庭下。公驚問之。云前任知縣陸鴻漸。頃遭劫賊。留一女子在此。念其流落無歸。常相隨逐。今蒙矜憐。特為嫁遣。故來相謝。公緣此陰德。增壽一紀。將來子孫三人同及第。語訖遂不見。後果如所言。

宋閩之富人。苦無子。多市婢妾。終無妊者。有武官自廣東携家至福唐。貧甚。不能去。妻且死。失措。但號慟。有女將笄。且有姿色。問其父曰。人死安得久停。漸致敗壞。奈何。父曰。汝將何如。曰。以我貨之。得錢必多。葬母之餘。父以為行道費。立券期以三年。父待闕至。我已限滿。可同往也。父曰。我非不知也。念平生只汝一女。此何忍為。亦不忍言也。女曰。不然。舍此無策。盍早為之。父黽勉從之。試問之。邸翁。邸翁曰。此有某人無子。數令我尋訪溫良賢淑之女。今往言即諧矣。果如翁言。父於是得錢三百千。葬其妻畢。徬徨未忍舍去。女既歸。富人富人大喜。入其房。不敢作憂戚色。乃強笑語。應對詳雅。富人自覺非偶。語言進止。若震驚。皆失其常度。躊躇良久。乃告其妻曰。女非常女也。吾疑且懼。翌日見女以素帛總髮。問之。則云貧故也。使

易之女又僂倪為易終不言其喪母也。富人即呼邱翁究之。翁具告焉。富人曰：吾固疑之矣。即日昇還。其父驚以謂背券約而取金焉。湏臾富人亦至。謂父曰：初不知之也。今以女還父。且再遺二百錢。云：他日仕宦來此。幸相覓也。於是父子拜謝之。富人歸。夜夢人若相賀者曰：汝不當有子。以近日一善事所感。當得三子。妻亦夢焉。未久富人果生三子。富人姓王。住福唐城東。福唐人謂手為爪。謂拳攣為蟠。富人一手拳攣。鄉人呼之為王蟠爪。

晉殷仲堪遊於江濱。見流棺接而葬焉。旬日間。門前之溝忽起為岸。其夕有人通仲堪。自稱徐伯玄。云：感君之德。無以報也。仲堪因問門前之岸。是何祥也。對曰：水中有岸。其名為洲。君將為州。言終而沒。至晉武帝時。果授仲堪都督荆益寧三州軍事。荊州刺史。

漢孫鍾家於富春。幼失父。事母至孝。遭歲荒。以種瓜為業。瓜熟。常以設行者。家事福德神甚虔。瓜熟。未獻神。不以設也。忽有三少年詣鍾。乞瓜。鍾曰：吾未獻神。子姑坐。即起入獻神。引少年入。設瓜及飯。飯訖。三人謂曰：我

蒙君厚恩。今示子葬地。葬之後。子孫世世貴不可言。遂令鍾下山百許步。勿反顧。見我去。即葬地也。鍾去不六十餘步。便返顧。見三人並為白鶴飛去。鍾記之。遂於此葬母。其地在縣城東塚上。常有五色雲氣屬天。鍾後生。堅。母孕堅。夢腸出。繞吳閭門。以告隣母。曰。安知非吉祥。堅後生。權。權生亮。亮生休。休生和。和生皓。皆王於吳。

魏任城王章。好行陰德。時亂軍殺傷者。皆無棺槨。王皆收其骨。葬之。及王薨。喪出葬。聞空中數百人泣聲。送者皆言。王之仁惠。及於死者。故精靈以之懷感焉。

宋許教授知可。毗陵人。嘗獲鄉薦。省闈不利而歸。舟次吳江平望。夜夢白衣人曰。汝無陰德。所以不第。知可曰。某家貧無資。可以與人。白衣曰。何不學醫。吾助汝智慧。知可輒寤。歸踐其言。果得盧扁之妙。凡有病者。無問貴賤。診候與藥。不受其直。所活不可勝計。後舉又中鄉評。赴春官。艤舟平望。復夢前白衣人相見。以詩贈之。曰。施醫功大。陳樓間處。殿上呼臚。喚六作五。思之不悟其意。姑記於續。紹興壬子。以第六人登科。因上名不祿。遂陞第。

五其上則陳祖言其下則樓材方省前夢也。

晉許遜未為旌陽縣之先。歲饑。民無以輸租。郡邑繩以法。率多流移。洎遜蒞事。日乃以靈丹點瓦礫化黃金。令人潛瘞於縣之後圃。一日籍民之未輸者。咸造于庭。使吏詰責之。令服力役於後圃。民鏹地獲金。得以輸納。故免逃竄之憂。悉按堵。隣境流移之民慕其德惠。來依附者甚衆。遂至縣邑戶口增行。人物富庶焉。後以陰德所致。得道成仙。遂白日拔宅上升。

唐李珣。廣陵郡中人也。世居城市。販糴為業。而珣性端謹。異於常輩。年十五。隨父販糴。父年老。珣繼之。人與之糴。珣即授以升斗。俾令自量。不計時之貴賤。一升只取兩文。利以資父母。歲月既深。衣物甚豐。父恠而問之。具以實對。父曰。吾之所業。同流者衆。無不用出入升斗。出輕入重。以規厚利。雖官司以春秋較推。莫斷其弊也。吾早悟之。但一升斗。出入皆用之。自以為無偏矣。汝今更出入任之自量。吾不可及也。然衣食黽給。豈非神明之助耶。後父母歿世。及珣年八十餘。不改其業。後值李珣出相。節制江南。而珣以新節制同姓名。乃改名寬。李珣下車後數月。脩道齋。次夜夢入洞府中。

見景色正春。煙花爛熳。翔鸞舞鶴。彩雲瑞霞。樓閣連延。珏獨步其下。見石壁光瑩。填金書字。列人姓名。內有李珏字。長二尺餘。珏視之極喜。自謂生於明代。久歷顯官。又陞宰輔。能無功德及於天下。洞府有名。我仙人也。再三為喜。方喜之際。有二仙童自石壁左右出。珏問此何所也。曰華陽洞天。此姓名非相公也。珏驚復問。非珏何人也。仙童曰。此廣陵部民也。珏及曉。歷歷記前事。益驚歎。問於道士。無有知者。始召廣陵官屬詰之。亦皆莫知也。乃令府城內求訪同姓名者數日。軍營里巷相推。乃得李寬。舊名珏。以車迎之入府。致淨室。珏齋沐拜為道兄。一家欽事。朝夕參禮。李寬情性素澹。道貌秀異。鬚長尺餘。皓然可愛。年六十時。曾有道者教以胎息。亦久不食。珏愈欽之。及月餘。乃問道兄平生得何道術。服煉何藥。珏曾夢入洞府。見石壁姓名。仙童所指。是以迎請師事。願以相授。寬辭以不知道術服煉之事。珏虔拜以問。寬所脩如何。寬以愚民不知所脩。遂具貶糴以對。珏再三省問。咨嗟曰。此常人之難事。陰功不可及也。遂師其胎息。後李寬一百餘歲。輕健異常。忽告童子曰。吾寄世多年。雖然養氣亦無益。汝

輩一夕無疾而終。三日棺裂有聲。視之衣帶不解。如蟬蛻焉。屍已解矣。

漢周義山字季道汝陰人也。丞相勃之後。父秘陳留刺史。義山年十六。讀書外常以平旦日出時。東向嗽咽服氣百數。經年。父問之。對曰。義山中心好此日光長景之暉。是以服之。是歲陳留多飢民。義山傾家財以濟之。有黃泰者。元鳳中寓陳留。着敗衣。賣芒履。義山見之曰。聞仙經云。仙人目方面光。密竒之。使人買芒履。常以金帛著物中。陰以與之。泰後詣義山。義山延之靜室。泰曰。聞君好道。陰德流行。感於我。是以相詣。吾中嶽仙人蘇子玄也。義山再拜膝行而進。自陳少好長生。今靈啓神降。得接聖顏。乃請乞竒要。仙人遂授以長生之道。後義山為紫陽真人。白曰。昇天。

漢劉翊字子翔。一云子相。潁陰人。少好道德。而家世大富。常周窮困。而不以為患。嘗行於汝南界中。有陳留張季札遠赴師喪。遇寒冰。車敗停滯道路。翊見而謂曰。君慎終赴義。行宜速達。即下車與之。不告姓名。策馬而去。季札意其為翊。後到潁陰。還所假車。翊閉門辭却。不與相見。常守志卧疾。不屈聘命。河南郡引為功曹。後黃巾賊起。翊救急乏絕。資其食者數百人。

鄉族死亡。則為殯殮。鰥夫則助其妻妾。獻帝遷都。而京舉上計掾。爾時道
路寇阻。翊夜行晝伏。乃到長安。上嘉其忠勤。拜議郎。遷陳留太守。翊又散
珍寶。唯餘車馬。自載東歸。出關數百里。見士大夫病死道次。仍又以馬易
棺脫衣。餼之。又逢知故。飢困於路。不忍委去。因殺所駕牛以救其乏。一日
行達陽平。遂遇馬皇先生。告翊曰。子仁心陰德。感通天神。太上特嘉子之
用情。故使我來授汝以長生之道。吾仙官也。爾能隨我去不。翊於是叩頭
曰。少好長生。幸遇神仙。乞願侍給。馬皇先生因將翊入桐栢山中。授以隱
地八術。服五星之華法。後度名東華為右理中監。

晉殷文祥。一名道筌。自稱年已七十。而面光白。若四十許人。曾賣藥於荆
州。時多疫癘。無貴賤。皆與之藥。所活不可勝數。人謂之神醫。得一錢即施
與貧者。又多為橋梁。以便往來。凡利人之事。行之不倦。一日謂人曰。吾夜
見神人。謂我有陰德。當登仙矣。衆疑其妄。明日遽辭別。往甘露寺北崖。遂
乘雲而去。後十餘年。人見在江西賣藥。又見在蜀者。終莫知所之。

司允義者。吳郡人也。學道於蜀中。能消災除病。以藥救濟百姓。服者立愈。

功德感天。天神識之。周赧王十年丙辰。老君遣使召隱士沈羲。羲一日與妻賈氏共載詣子婦卓孔寧家。道逢龍車虎車白鹿車各一乘。從騎數十人皆朱衣。伏矛帶劍。輝赫滿道。問羲曰。君是道士沈羲否。羲愕然。荅曰。是也。騎曰。羲有功於民心。不忘道。從生以來。履行無過。多有陰騭。老君今遣仙官相迎。侍郎薄延白鹿車是也。度世君司馬生青龍車是也。送迎使者徐福白虎車是也。須臾三仙羽衣持節。以白玉冊青玉界丹玉字授羲。碧落侍郎羲不能讀。遂載昇天。時道間耕鋤人共見之。須臾大霧霧解。失其所在。但見羲所乘車牛在田中食苗。以語羲家子弟。遂數百人求之。不知羲之蹤跡。至後漢殤帝延平元年。凡四百一十二年。乃還鄉里。推求得數十世孫。名懷喜。懷喜曰。聞先世祖相傳有祖仙去。竇太后疾。嘗遣使請羲。安帝時猶在人間。後復昇天。

五代居士郭智汾州平遙人也。為人淳厚。喜怒不形于色。好行陰德。鄉閭高之。其父嘗曰。起家者必此子夫。無何有白犢之戚。居士履之自若也。其妻何氏憂之。忽夜夢人告曰。若無憂。起家之事將自此始。遂投以金文一

帙。何發而視之。惟焦僥兩子。御史嚴叟八字而已。明日以告居士。居士莫究其旨。會宋興。太祖太宗削平僭亂。河東底平。朝廷以河東負固。最後歸化。遂遷其民於河南。居士既至河南數月。忽有窶者款門。其容甚瘁。已乃箕踞而坐。曰。與吾取水。居士呼從者進之。窶者怒而起。曰。飲長者水。而不能親授。乃使從者進之乎。遂不顧而去。明日復來索水。居士蹶然親起而進之。窶者亦不飲而去。如是者三。居士之意愈勤。不少怠也。窶者曰。此子可教。即探囊以藥一瓢遺之。曰。用此藥可愈子疾。居士拜而受之。既用之。其効若神。居士以衣一襲為謝。明年復具冬夏時服。他歲亦如之。數稔朝廷復其民。居士將有河東之行。即奉幣以別。曰。今朝廷詔還得奉先人丘壠。固厚矣。然不能從先生方外遊。斯為不足。窶者歎曰。吾閱人多矣。未有如郭君之賢者。於是始以方授之。居士尚未神其事也。後至平遙之初夕。夜未央。忽有呼居士者。居士念曰。吾方抵此。寧有識之者耶。意甚疑之。倉皇未有以應。俄見紅光如線。自外透入。須臾明照室中。秋毫可數。又見一

無恐也。吾即河南之寔人。爾若尚能記汝昔日之夢乎。即河南相會之言也。向所遺書切宜寶之。言訖忽不見。光亦漸歛。居士因悟。昔八字云。僬僥者小人也。小人。尔字。兩子者。二人也。二人。夫字。御史直人也。直人。值字。巖叟者。山人也。山人。仙字。居士自是方神其術。後有目疾者。無問遠近咸被其賜焉。先是居士之祖。以子孫不競。今日者筮之遇坤之謙。日者喜曰。是殊遇之卦也。夫坤順也。衆也。謙致和而卑以自牧也。六爻無犯而三為陽。陽為德為報為明。其於人也為真仙。君之子孫久將蕃盛。上下協睦。六世同爨乎。及三世將真仙。三者八之牡也。逮八世亦然。君其齒之。至居士果有河南之遇。居士孫曾壽後兄弟七人。家百餘口尚同爨而食。竟如日者語。初居士與友翼使君樂郊居。遂卜居於平遥之東。人景慕之。相繼而居者百有餘家。遂成里第。人因號其居曰冀郭。

晉沙門安慧。少無恒性。卓越異人。而工正書。善能談吐。永嘉年中。天下疫。病則晝夜祈禱。願天神降藥以愈萬民。一日出寺門。見兩石形如甕。疑是異物。取看之。果有神水在內。病者飲服。莫不皆愈。後止洛陽大市寺。手自

細書黃蘗大品經一部。合為一卷。字如小豆。而分別可識。凡十餘本。以一本與汝南周仲智妻母胡氏供養。胡氏過江。貴經自隨後。為災火所延。倉卒不暇取經。悲泣懊惱。火息後。乃於灰中得之。首軸顏色。一無虧損。于時同見聞者。莫不迴邪改信。

五季時。鄭屯田建中。居安陸。貲鏹鉅萬。城中居人多舍客也。每大雨過。則載瓦以行。問有屋漏則補之。若舍客自為之屋。亦為繕完。又隆冬苦寒。蠲舍繕仍月。屯田公晚得一子。即侍郎公紆也。侍郎有五子。長曰獮。皇祐元年登第。官至朝奉大夫。次即侍讀公敦夫也。皇祐五年。魁天下士。三子與孫皆任以官。不由選調。世祿不絕。陰施之報。蓋不誣矣。

昔有五百賈人。入海採寶。內一人善知兵法。恒為寇盜欲殺諸人。謀取其寶。還閩浮提。爾時有人名曰大悲。眾中導師。夜夢神報。此有惡人。起不善心。殺五百眾。取其財寶。此五百人。皆不退轉菩薩。惡人殺者墮入地獄。汝為導師。可作方便。令彼惡人不墮地獄。彼五百菩薩可得全其身命。爾時大悲如是思惟。更無方便。唯有除此惡人者。乃可令此五百人得全身命。

我若說時。此五百人當生惡心。殺此惡人。彼諸人等皆墮惡道。大悲思惟。我今當自殺之。雖百千劫墮惡道中。受地獄苦。我須忍之。爾時大悲生哀愍心。作是方便。吾護五百人。故害此惡人。即以穢矛刺殺。令諸商人安穩得還。善男子。道師則我是五百賈人。則賢劫中五百菩薩。當此劫中得證菩提。我行方便故。即得超越百千劫生死之難。

昔梓潼帝君。自言本吳會間人。生於周初。後七十三化為士大夫。未嘗酷民虐吏。性烈而行察。如秋霜白日之不可犯。後西晉末。降生於越之西。雋之南。兩郡之間。是時丁未年二月三日誕生。祥光罩戶。黃雲遶野。居處地俯近海。里人謂清河叟曰。君今六十而獲貴嗣。童稚時不喜嬉戲。每慕山澤。往往語言。若有隱顯。晝誦群書。夜避衆子。自笑且樂。身體光射。居民祈禱者。則余嗤而訕。長嘯曰。土木而能衣人之衣。食人之食。享之而有應。謗之而有禍。我為人而焉無靈乎。自後夜或夢為龍。或為王者。天符或為水府漕。自恠而不甚信為吉兆。後三農憊旱。嘉禾無甦。舞雩祝神。恬然無驗。余曰。寐中夢治水府。今夕當驗。夜往水際。以夢中官銜牒河伯。而驚魂尤恐。

忸怩不能。忽爾之時。陰雲四合。風飛雷震。一吏稽首余前曰。運判從居。余曰。非我也。我乃張戶孝子名亞。吏曰。奉帝命促子。余曰。家人何如。吏曰。先到詔所。余惶懼未決。吏揖請上一白驢而去。俛首里閤。風雨聲中。頓失鄉地。到一山連劒嶺而撐參宮星也。若鳳凰之區。下有古湫。引余入一巨穴。門有數石筍。吏曰。民之禱雨。祝此石而有應。名曰雷柱。吾方褰衣入穴。吏又曰。君記周室七十三化。陰德傳家而迄今否。余方大悟。若夢覺也。吏曰。吾在天譜得神仙之品於人世。鮮有知之者。晉不日有中興之兆。君可尋方而題化。余曰。謝天使響報也。入穴則若墮千仞之壑。近地而足不沾。若騰身虛空。有王者之宮。中有禁衛。余遂見家人悉在其間。

昔有小國。去城不遠。有好林藪。有五道士於中學道。有一比丘得六神通。有一沙彌。華云息慈年始八歲。共在山中。各一面坐。思惟經道。師知沙彌命餘七日。在此亡者。父母謂吾看視不快。使其命終。必懷怨恨。即語沙彌。汝父母思汝。汝可歸家。八日早來。沙彌歡喜稽首而去。道逢大雨。流潦滂沛。地有義穴。流水欲入。沙彌念曰。我佛弟子。一者慈心。二者活生。即便壅土決。

水令去。沙彌歸家。無有他變。八日晨還。師遙見之。恠其所以。七日應死。今何因緣。得非鬼神化現來乎。即入三昧。見其救蟻。現世延壽。沙彌至。稽首作禮。於一面坐。師謂言。汝作大功德。為自知否。沙彌言。七日在家。無他功德。師言。汝命應盡。昨日以救蟻。故現世增壽八十餘年。沙彌歡喜。言善有報。即更勤脩。精進不懈。得阿羅漢。

唐孫思邈。京兆華原人也。七歲就學。日誦千言。及長。好談莊老百家之說。周宣帝時。以王室多事。隱於太白山學道。鍊氣養形。求度世之術。洞曉天文。推步精究。醫藥審察聲色。常蘊仁慈。凡所舉動。務行陰德。濟物為功。偶出路行。見牧牛童子。殺小蛇。已傷血出。思邈求其童。脫衣贖而救之。以藥封裹。放於草內。復月餘出行。見一白衣少年。僕馬甚壯。下馬拜思邈。謝以言曰。小弟蒙道者所救。思邈聞之。不以為意。少年復請思邈。以別馬載之。偕行如飛。到一城郭。花木正春。景色和媚。門庭煥赫。人物繁雜。儼若王者之居。少年迺思邈入。見一端正美貌人。給帽絳衣。侍從甚衆。欣喜相接。謝思邈曰。深思道者。故遣兒子相迎。前者小兒獨出。忽為愚人所傷。賴脫

衣贖救獲全其命。此中血屬非少。共感再生之恩。今得面見道者。榮幸足矣。俄頃延入。若宮闈內。見中年女子領一青衣小兒出。再三拜謝。思邈曰。此兒癡騷。為人傷損。賴救免害。思邈省記。嘗救青蛇。即訝此何所也。及見左右皆闈人。宮妓呼袷帽為君王。呼女子為后妃。心異之。潛問於左右曰。此涇陽水府也。王者乃命賓僚設酒饌妓樂。以宴思邈。思邈辭以辟穀。服氣。惟飲酒爾。留連三日。問其欲。對曰。山居樂道。思真鍊神。目雖所窺。心固無欲。乃以輕綃珠金贈行。思邈堅辭不受。曰。道者不以此為意耶。何以相報。乃命其子取龍宮藥方三十首與先生。此真道者。可以濟世救人。俄復命僕馬送先生歸山。既歸。深以為異。歷試諸方。皆若神効。後著千金方三十卷。散龍宮方在其內。又以聲色診人之疾。著脉經一卷。大行於世。隋文帝時。徵為國子博士。不就。嘗謂人曰。過此五十年。當有聖人出。吾方助之以濟生人。至唐太宗時。召詣京師。訝其容貌甚少。曰。故知有道者。誠可尊重。羨門之徒。豈虛言哉。將授以爵位。固辭不受。高宗初。拜諫議大夫。復固辭。時年九十餘。視聽不衰。范陽盧照隣。有時名而染惡疾。嗟稟受之不同。

昧遐天之殊致。問於思邈曰。名醫愈疾其道如何。對曰。吾聞善言天者。必
質於人。善言人者。必本於天。夫天有四時五行寒暑迭代。其轉運也。和而
為雨。怒而為風。凝而為霜雪。張而為虹蜺。天地之常數也。人有四肢五臟。
一覺一寐。呼吸吐納。動而為往來。流而為榮衛。彰而為氣色。發而為聲音。
此人之常數也。陽用其情。陰用其形。天人之所同也。及其失也。蒸則生熱。
否則生寒。結而為疝贅。陷而為癰疽。奔而為喘息。竭而為焦枯。冷發乎面。
變動乎形。推此以及天地。則亦如彼。故五緯盈縮。星辰失度。日月錯行。彗
孛流飛。此天地之疾疢也。寒暑不時。此天地之蒸否也。石立土湧。此天地
之疣贅也。山崩地陷。此天地之癰疽也。奔風暴雨。此天地之喘息也。雨澤
不時。川源涸竭。此天地之焦枯也。良醫道之以藥石。救之以針劑。聖人和
之以道德。輔之以人事。故人有可愈之疾。天地有可消之災。又曰。膽欲大
而心欲小。智欲圓而行欲方。詩曰。如臨深淵。如履薄冰。謂小心也。趙趙武
夫。公侯干城。謂大膽也。不為利迴。不為義疚。行之方也。見機而作。不俟終
日。智之圓也。照隣曰。非君則不聞是言矣。蓋其文學也。穎出。其道術也不

可勝紀。高宗後授承務郎。致之尚藥局。辭不就。永徽三年二月十五日晨起沐浴。儼其衣冠。端拱以坐。謂子孫曰。我為世人所逼。隱於洞府。修鍊將昇。無何之鄉。臣於金闕。不能應召往來。俄氣絕。遺令薄葬。不設明器。牲牢之奠。月餘。顏色不變。舉屍入棺。如空衣焉。已屍解矣。

唐呂志真。內潔而外和。似不能言者。好脩陰德。專以藥石濟人。每歲一至京師。遊瀟湘。常荷二大瓢。經籙道。具皆貯之。後居商山。石室甚隘。一夕致醺。忽山開數十步。其中平敞。復有黑豹馴繞其側。有神人授以金簡曰。上帝以爾累世脩德行善。特召爾掌仙籍。其夕屍解。

蜀巫山道人黃萬護。薦好濟人。勤懃不倦。遂感神人。授以道術。所濟無筭。蜀主王建嘗召之。鋪草薦水面。泝流而上。一日至成都。後得仙而去。莫知所之。

唐金可記。新羅人也。貢貢進士。性沉靜。好道。不尚華侈。或服氣煉形。自以為樂。博學彊記。屬文清麗。姿容舉動。言談迥有中華之風。既擢第。於終南山子午谷葺居。懷隱逸之趣。手植奇花異果。極多。常焚香靜坐。

若有思念。又誦道德及諸仙經不輟。後三年思歸本國。航海而去。復來衣道服。却入終南。務行陰德。人有所求。無阻者。大中十一年十二月。忽上表言臣奉玉帝詔為英文臺侍郎。明年二月二十五日當上昇。時宣宗極以為異。遣中使徵入內。固辭不就。又求見玉帝詔辭。以為別仙所掌。不留人間。遂賜宮女四人。香藥金綵。又遣中使二人看侍。然可記獨居靜室。宮女中使不得接近。每夜聞室內有客談笑聲。中使竊窺之。但見仙宮仙女各坐龍鳳之上。儼然相對。復有侍衛非少。而宮女中使不敢輒驚。至二月二十五日。正春景妍媚。花卉爛熳。果有五雲咲鶴。翔鸞白鵠。笙簫金石羽蓋。瓊輪幡幢滿空。仙仗極衆。昇天而去。

晉王少道與同志李伯山。常以陰德密惠拯救於人。皆積世有道。至行所鍾。累功積德。以至成仙。少道嘗謂人曰。功滿三千。白日冲天。脩善有餘。坐降雲車。弘道不已。自致不死。斯言信矣。

晉周暢性仁惠。和薦穆帝時為河南尹。永和二年夏旱。久禱無雨。因收糞枯骨萬餘。乃大雨。後位至光祿勳。

漢幽州刺史趙熙。少有善行。常濟困窮。救王惠等族誅。行陰德數十年。熙得詣朱陵。其子得遊洞天。其女名素臺。為易遷宮夫人。在易遷宮中已四百年。不肯移去。自謂天下無復樂於此處也。數微服遊行。丐山澤以自足。熙父子所以得至此者。皆源陰德之功。

唐譚峭。字茅山道士。敬宗寶曆中。遊天台山。澗年貌如二十許人。人亦不知其有道。務以陰功救物。常遺金於途。以賑貧乏。或報之。殊不認。問其故。則曰。陰真君化土為金。以賑不足。吾恨不能。且無用之物。以遺人。亦何恠。久而知其有術。神丹以化瓦礫。符篆以制鬼神。或者語隋煬帝東巡事。峭岩忽失言曰。大業中。開丹陽河。斷三岡脉。其下血流。吾嘗往觀之。由此知峭岩之壽。蓋數百年矣。弟子鄧甲久事之。授以丹訣符術。而不能其妙。但陸擒兕虎。水縛蛟螭而已。峭岩謂曰。人賦分有定。水不能致其熱。火不能致其寒。雖盡吾之道。而汝則止是矣。文宗開成中。輕舉於南嶽。

昔王老坊。州宜君縣人。居村野。頗好道。愛客。務行陰德。其妻亦不倦。一旦有豎。樓道上。造其明。王老與妻俱。迺禮之。居月餘。間曰。與王老言。談杯酌。

甚狎俄患遍身惡瘡。王老求醫藥看療。益加勤切。而瘡日甚。一日逮將逾年。道士謂王老曰。此瘡不煩以凡藥相療。但得數斛酒浸之。自愈。於是王老為之精潔。釀酒既熟。道士言。以大甕盛酒。吾自加藥浸之。遂入甕。三日方出。鬚髮俱黑而顏復少。肌若凝脂。王老闔家視之。驚異。道士謂王老曰。此酒可飲。能令人飛上天。以君有陰德濟世。吾故言之。徐看所釀之酒。清冷香美異常。時方打麥。王老與妻子并打麥人共飲。皆大醉。道士亦飲。云欲上天否。王老曰。願隨師所適。於是祥風忽起。彩雲如蒸。居舍草樹。全家人物雞犬。一時飛去。空中猶聞打麥聲。數村人共觀望。驚歎。唯猫鼠棄而不去。風定。打麥二人乃遺在別村樹下。後亦不食。皆得長年。宜君縣西三十里有昇仙村在焉。

晉周廣字惠常。大將軍瑜之後。好行陰德。見人之貧窮困苦者。必濟之。嘗與同志遊巴蜀雲臺山。得漢天師驅剪精邪之法。專以救民疾苦為事。聞許真君在旌陽。詣公庭。願備下執。真君納之。令供侍杖履。夙夜惟勤。遵行道法。以濟生靈。始終不忘。乃就宅西百餘步間。築室以居。真君飛舉。惠常

與曾興國同驂龍車。白口仙去。宅號宣昭府。政和二年封元通真人。

晉時荷字道陽。少脩道德之教。入四明山。遇神人教以胎息衆妙之術。因能却寐絕粒。役使鬼神。驅除邪魅。點化金玉。賙濟窮苦。民受其賜。聲聞遠近。惠帝之世。聞許真君仁孝道法盛行江左。徒步踵門。願充弟子。真君納之。授以秘訣。復遣還山。教導徒衆。明帝詔赴闕。師問之。堅不願留。竟歸。依棲真君侍側。功成行著。以寧康二年。與陳孝舉執冊道符昇天。

晉沛郡施岑。字太玉。祖朔。事吳。因徙居九江赤烏縣。岑狀貌雄傑。勇健多力。弓劍絕倫。尤善治療之術。專行濟利。許真君初領徒誅海昏大蛇。會鄉壯三百餘人來助力。太玉預焉。致恭懇乞。願充役者。真君納之。與甘洎。武常。執劍侍左右。真君念太玉陰德甚厚。所秘經典。並以付之。寧康二年十月二十八日。晨見東方日中有一童子。乘彩雲。執素策。驅蒼虬。降其所居。宣王帝詔。遂御蒼虬。乘雲而去。

晉王遙。字伯遠。鄱陽人也。好行陰德。遇異人授以道術。頗行治病。病無不愈。亦不祭祀。不用符水針藥。其行治病。但以一條八尺布。肥敷地座。不飲

不食。頃臾病愈。即起去。其有邪鬼作禍者。遙畫地作獄。呼召之。皆見其物在獄中。或狐狸鼯蛇之類。迺斬之。燔燒。病者即愈。遙有竹篋長數寸。有一弟子姓錢。隨遙數十年。未嘗見遙開之。嘗一夜大雨晦冥。遙使錢以九節杖擔此篋將出行。雨不沾。遙及弟子衣皆不濕。所行道非所常見。兩炬火導前。當行三十里許。登一小山入石室。石室中先有二人。遙既至。取弟子擔篋發之。中有古竹簧三枚。遙自鼓一枚。以二枚與石室中二人。並鼓之。良久。遙辭去。取三簧皆內篋中。使錢擔之。室中二人出送遙。語遙曰。卿當早來。何為久住俗間。遙荅云。我早晚來也。遙還家百日許。天復雨。遙夜然燈火。莊嚴。遙先有葛單衣及葛巾。已五十餘年未嘗着之。此夜皆取着之。因自擔篋而去。遂不復還。後三十餘年。弟子又見遙在馬蹄山中。顏色更少。蓋已為地仙矣。

宋梁母。盱眙人。好以陰德濟人。舍逆旅于平原。客來宿者。任還錢多少。所得施諸貧寒。嘗有少年住經月。臨去曰。我東海小童也。至元徽四年。馬耳山道士徐道盛於蜂城。西遇一青牛車。見一童。呼云。徐道士。前去車三步。

許止。又見二童子着皂衣絳裏車中人遣一童子傳語曰。我平原梁母。今太上以我有陰功召我。應過蓬萊。我心憂勞。汝為我謝東方士女也。言訖遂馳車騰逝。極目而沒。道士還逆旅訪之。正梁母度世日相見也。

唐開元中。長安裴氏子。廼平門外有莊。兄弟三人。未仕。以孝義聞。惟好施惠。務行陰德。常有一老父過之求漿。顏色稍異。裴子待之甚謹。問其所事。云。以賣藥為業。問其族。曰。不必言也。因是往來宿於裴子舍。數年裴無倦色。嘗一日謂裴曰。觀君兄弟至寔。而能恭謹不倦於客。實長者。必有大福。今為君致少財。以備數年之用。裴謝之。老父遂命炭數斤。坎地為壚。煽之。命取小甌。瓦如手拍大數枚。燒之。皆赤。懷中取少藥投之。乃生紫烟。變為金矣。約十餘斤。遺於裴子。謂裴曰。此價倍於常者。度君家三年之蓄矣。吾去後。君家罄盡。當復來耳。裴氏因問其居。云。復當相示焉。訣別而去。裴氏貨其金積糧。明年水旱。獨免其灾。後三年。老父復至。又燒金以遺之。裴氏兄弟一人願從學。老父遂將西去。至太白山西巖下。有大磐石。左倚石壁。老父以杖叩之。須臾石開。乃一洞門。內有黃冠及小童迎接。老父引裴生

入。初猶暗黑。漸即明朗。見城郭人物。內有宮室堂殿。道士玉童仙女無數。相迎歌樂。諸道士或琴瑟言論。老父引裴氏禮謁。謂諸人曰。此城中主人也。留住一宿。設胡麻飯。麟脯仙酒。裴告歸。老父送出洞。遺以金寶。謂曰。君今未合久住。且歸。後二十年。天下當亂。此是太白左掩洞。君至此時。可還來此。吾當相接。裴子拜別。比至安史之亂。裴氏全家西去。隱於洞中。數年。居處仙境。咸受道術。亂定復出。兄弟皆至大官。一家良賤亦皆壽考。

唐劉白雲。揚州江都人也。家富而義。多以財濟人。務行陰德。尤喜脩行之事。忽於江都市遇一道士。自稱樂子長。謂曰。子陰德甚厚。天籙仙骨。流浪塵中。何也。因出袖中兩卷書與之。白雲捧書開視篇目。子長曰。子先得變化。而後受道。乃一一指摘次第教之。依而行之。能役致風雨。變化萬端。於襄州隔江一小山。化鸞鶴數千。飛翔其中。結紫雲帳幄。天神侍衛。連月不散。節使于頔音迪疑妖幻。使兵馬使李西華引兵攻之。帳帷侍衛漸高。弓矢不能及。判官竇慶約曰。此幻術穢之。即散。乃取尸穢焚於其下。少頃白雲遂乘馬與從者四十餘人。走於漢水上。蹙波如履平地。追之不得。謂追者

曰我劉白雲也。元和中。桂州觀察使王遜。好道。白雲時來郡中。忽一日。暫往湖南。即於鍾陵相見。辰發靈川驛。午在湘潭縣。驗其所行。頃刻七百里。旬日王遜除洪州。白雲亦來相訪。後於江都值樂真人。曰。爾周游人間。固有年矣。金液九丹之經。今授於尔。可選名嶽服之。以登雲天。軋符中。猶在長安賣藥。人識之。蓋不可親矣。

隋蕭靈護。字天佑。廬陵人。少好道法。見貧窮飢寒者。必與之以衣食。又建橋修渡。以利涉往來。雖聲其貴。不以為意。人或謂曰。君貧無自苦也。靈護曰。陰德莫大於濟人。吾聞有陰德者。必有福壽。吾安得而不為之。因過岳麓。夜遇鄧真人。語之曰。子多積陰功。吾傳子火鼎之術。唐太宗貞觀二年。游瀟湘。禮法主。行法驅邪。鄉邦得濟者。不可勝計。後居招仙觀。煉火鼎之術。化黃白。而外鬻之。脩造觀宇。為之一新。侯王禮敬。請為法主。皆傾心事之。五年。建尋真閣。六年壬辰。桂州鑄銅鍾一口。重五百斤。歸觀。凡五更不敢扣擊。蓋驚地神故也。後選其幽勝。煉神丹於山北。凡經三壇。方始煉就。後服之。於高宗弘道二年中秋。謂門人曰。吾行期已至。當有所適。不可淹。

留汝等精勤將有所繼是夕遂尸解

梁葉千韶字魯聰洪州建昌人。秉志濟人。精通醫藥。所利濟甚衆。又學十
二真君道術。辟穀服氣。居山。忽雷震。有一白衣人謂千韶曰。君陰德甚厚。
道備仙籍。當在人間。役使鬼神。今神人降。俄有真官降。部役鬼神。執簿一
卷。謂千韶曰。天命授君神將吏兵。以救世民。千韶開簿。請召即應。作法救
旱潦。以符救病。咸通十一年。遊濠州。刺史劉昉中風。千韶以三符貼於肩
脇。曰。驅風從足而出。三日果愈。不受謝而去。隱於西山。為地仙。

晉趙尊師者。遂州人。誓以濟人為務。有異人重其陰德。授以道術。因善役
使山魃。令挈書囊席帽。故所居百里。絕無妖怪。鬼物為人患者。有民阮瓊。
女為精恠所惑。每臨夜。梳粧似有所伺。必迎接言笑。召人醫療。必先知其
姓名。瓊乃奔請尊師。趙曰。不勞親去。乃以白絹朱書大符與之。瓊貼其符
於戶。至一更。聞有巨物中擊之聲。如冰墮地。然燭照之。乃一巨鼃死在地。
符即不見。女乃醒然自悟。又與一符。令女吞之。自是無恙。而朱書大符却
歸在按矣。後竟仙去。

漢周爰友河南尹周暢伯持之女也。暢汝南安成人。好行陰德。功在不覺。尹河南時。遭大旱。收葬洛陽旁。客死骸骨萬餘。為立義塚。祭祀之。應時大雨。豐收。所行多是此事。太上特以暢有陰行。令爰友從南宮受化。得道成仙。

唐則天末年。益州有一老父。好行陰德。常携一壺於城中賣藥。得錢即濟人貧乏。如此經歲餘。有疾得藥者無不愈。每遇有識者必告之。曰。夫人一身便如一國也。人之心即君主也。旁列藏府即內輔也。外張九竅即外臣也。故心有病則內外不可救之。但凡欲身之無病。必須先正其心。不使亂求。不使枉思。不使嗜慾。不使迷惑。則心先無病。而內輔之藏府雖有疾。亦難療也。外之邪竅亦無由受病也。況藥有君有臣。有佐有使。苟或攻其病。君先臣次。然後用佐用使。自然合其宜。如以佐之藥用之以使。使之藥用之以佐。小不當其用。必自亂也。又何能攻人之病哉。此又像國家任人也。老夫賣藥。常以此為念。每患者一身。君不君。臣不臣。使九竅之邪恣納。以至於良醫無措。名藥不効。實治身之不得其道故也。悲夫。士君子記之。忽。

一日獨詣錦江解衣淨浴探壺中唯選一九藥吞之謂人曰老夫功已滿今歸島上俄化一白鶴飛去衣與藥壺並沒於水。

宋段璫字德瑱袁州萬載人知書天性淳謹未嘗忤物然遇不平事則奮臂而前高宗建炎間寇盜充斥段氏族屬四十口皆為所擄璫挺身持金往贖賊歎重其義皆付之使歸紹興五年東南諸處大旱斗米過千錢璫盡發宿藏止取常直又為粥以食飢者賴以全活不可勝計後忽厭人事結菴於嚴田之山中壁間多書坦蕩二字一旦召會親舊與叙訣曰不久天帝召我人不以為然經數日陞樓鳴鍾歛然淩雲而去鄉人走視所居惟弊衣履存。

宋樞密使盛文肅公度修起居注日嘗感疾而死肢體猶溫故家人未敢殮越宿乃蘇云始為人追攝若行田野間氣候昏塞如欲雨狀良久入一府見主者被古諸侯服起而接公且諭以同姓名而誤追又言公前世陰德甚厚今世未盡食其報遂歷告公以將來所歷而亟命公還既而復行田間遠望有數人皆若舊識及追視之乃故相國沈公義倫也喜揖盛曰

審知學士得還。為我語家人。頗為汗脚襪所苦。草草別去。盛神還。疾亦漸愈。遂以冥中所屬語。沈之孤。其孤泣而不悟。汗脚襪之說。及服除。徹公靈榻。而神座之橫櫬。有敗襪焉。究其所自。則守靈老卒之遺物。偶致於此。旦起忘之。謂已遺失。故不復索也。後文肅公所歷。一如主者所言。

宋右丞錢珣。與裴安居近。珣病死。再宿而活。言於妻子曰。人召云。命已終。然平生有陰德。不作罪業。便再為男子。遂去。市人畢瑫家。託身。入見其家。雖門戶低小。而物力甚豐。其畢氏妻有孕。月數足。將有所育。忽一使者持帖奔至。云誤矣。合在裴家為男。此處非也。又隨使者到裴家。見其妻。使者云。當在斯為子。緣裴氏月數未滿。今且回去。云四十日壽當終。爾及期而卒。裴家是日果產一男。容色有似右丞。

宋處州有老叟。住大溪傍。一夕夢一士人。在水中抱青龍長丈餘。且甚懼。臨門呼曰。活我。當厚報。叟曰。此不難也。即引手撻龍。龍去。士得登岸。覺而異焉。以語其子。明日正午風大作。波濤如山而至。一小舟碎於波間。有人弱水。持大青竹竿。連呼救人。叟出觀之。宛如夢所見者。急掉漁艇往拯救。

之已昏昏不能言。叟喚兒童策掖以歸。寘於室。為然火燎衣。具飲食。良久乃蘇。云。吾乃張體仁。建州浦城人也。因適永嘉。不虞遭此變。非叟仁心。則吾葬魚腹矣。留旬日。乃能復常。歡謝而去。叟亦不以所夢告之。張後登第。仕宦通顯。遣人訪叟家。致錢帛為謝。

昔佛住舍衛城南。有大林邑商人。驅八牛到北方俱哆國。復有商人共在

澤中放牛。時離車

華云邊地主也

捕得一龍女。穿鼻牽行。商人見之。即起慈心。

問離車言。汝牽此欲作何事。荅言。我欲殺噉。商人言。勿殺我。與汝一牛。買取放之。捕者不肯。乃至八牛。方言。今為汝故。我當放之。即取八牛。放去龍女。時商人復念。此是惡人。恐復追逐。更還捕取。即自隨看所向。到一池邊。龍女變為人身。語商人言。天施我命。今欲報恩。可共入我宮。當報大恩。商人荅言。汝等龍性。卒暴瞋恚。無常。或能殺我。荅言。前人繫我。汝能力救。彼以受布薩法。華言淨住戒法也故都無殺心。何況天今施我壽命。而當加害。小住此中。我先入。擗切政擋切浪。是龍門邊。見二龍繫在一處。問言。汝為何事。荅言。此龍女半月。中三日受齋法。我兄弟守護。此龍女不堅固。為離車所

得。以是故被繫。唯願天慈。語令放我。此龍女若問欲食何等食者。當索

浮提

華云勝金南贍部洲也

即人間食。龍女拊搗已。便即呼入。坐寶床褥上。龍女白言。

今欲食何等食。答言欲湏闍浮提人間食。即下種種食。問龍女言。此人何

故被繫。龍女言。此有過。我欲殺之。商人言。汝莫殺。答言。要當殺之。商人言。

汝放彼者。我當食耳。白言。不得直尔放之。當罰六月。擯置人間。商人問言。

汝有如是莊嚴。用受布薩法。答言。我龍法有五事苦。何等五。生時龍眠時

龍。嬉時龍。瞋時龍。一日之中。三過皮肉落地。熱沙搏身。復問汝欲求何等。

答言。出家難得。又問當就誰出家。答言。如來應供正遍知。今在舍衛城。未

脫者脫。汝可就出家。商人便言。我欲還歸。龍女即與八餅金。言。此是龍金。

足。汝父母眷屬終身用不盡。語言。汝合眼。即以神變持着本國。行伴先至

語其家。言入龍宮去。父母謂兒已死。眷屬宗親聚在一處。悲號啼哭。時放

牧者。及取薪草人見已。先還語其家。言某甲來歸。家人聞已。即大歡喜。

出迎入家已。為作生會。作生會時。以八餅金持與父母。此是龍金。截已

更生。盡壽用之。不可盡也。

宋時有曰者。苦貧窮。問言。於得道者。答曰。日月邊去。日者思之。乃明字。遂往明州。其術盛行。後復見得道者。問其故。答云。汝前世於彼開井。故也。是知衣食有地。皆前生所種陰德。故今生受之。況所積之德。有過於開井者耶。

宋王和封蜀人。善醫。鄉里道不行。入揚州界。求者如市。有得道者謂曰。揚州某處石橋。是汝前生造。故今生於彼處受福。

宋蜀僧悟詮。號覺海。有慧性。峽州富人程夷伯。年二十九。一夕夢其父謂曰。汝今年當死。可問覺海。其人茫然不曉。一日有僧說相。負覺海字。程請一相。問云。我壽幾何。覺海曰。君年促。老僧皆無求。但覓水一杯。呵氣入水中。令程飲之。曰。今夜有吉夢。可相報。即夜夢至一官府。左廊下。男子婦人。衣冠嚴整。皆相欣悅。右廊盡枷鎖縲紲之人。哀號涕泗。傍有人云。左廊是脩捨橋路人。右廊是壞毀橋路人。若爾要福壽。可自擇取。程即夢覺。發心凡百里之內。橋梁路道。一一脩整。用工畢。覺海復來。云。汝作此事。可延十年。程自是於道路上。用工不倦。壽遂得九十二。五世昌盛。

宗。張師中。秀州人。父仲淳。居鄉教授。以文學知名。人皆師禮之。好周人之急。常以財濟貧乏。病者給以藥。務行陰德。不求人知。忽有一商旅。途中抱疾甚困憊。投宿于仲淳。仲淳詢其來。但畧言其名氏鄉里。遂不能語而斃。仲淳閱其行裝。有金十兩。乃遣人召其妻子。護尸持金而歸。復捐貲經營葬之。是夕仲淳夢其人謝云。公平生不欺心隱財。陰德甚厚。故遠來託公以死。公待我以恩如此。願公明年生貴子。至期師中生。後舉進士第。登朝。帶館職。為京西漕使。尚書工部郎中。世為宦族。

昔山南道中有二道者。一人負畚鍤修路。一人空手立。但見負重之人。即替之負三二十里。人與之錢。便走不受。如此十餘年。二人一旦同往邛犍。一人善吹鐵笛。一人撫掌而和。或歌或舞。在闌闌中。數日。上州南白鶴山上。人隨看之。舉身凌空。旋有雲霧生。足吹笛撫掌冉冉而去。宗時一獄官。冬夜苦寒。欲就寢。其妻正色責之。曰。爾煖衣飽食。畏寒不出。獄中罪人當如何。其夫大感悟。自此常留意獄訟。此婦人本娼女。未有所生。一夜夢神人以綠衣槐簡付之。後生一子登第。

宋杳道字湛然歙州休寧人幼沉寢不羣以詞業稱淳化中赴舉貧不能上親族哀錢三萬遺之道出滑臺過父友呂翁家翁喪貧無以葬其母兄鬻女以襄事道傾囊中錢與之且為其女擇壻捐財資遣又故人卒貧甚其女為婢於人道贖之嫁士族縉紳甚服其行後知虢州歲蝗災民歎道不俟報出官廩米賑之又設粥以救飢者給州麥四千斛為種於民民賴以濟所全活萬餘人其居官時多茹蔬或止一食默坐終日嘗夢神人謂曰汝位止正郎壽五十七後歷官刺史年六十四論者以為公陰德所延也

嘉言

○安民則惠黎民懷之○無從匪彝無即怙淫各守爾典以承天休○民罔常懷懷于有仁○至治馨香感于神明黍稷非馨明德惟馨○功崇惟志業廣惟勤惟克果斷乃罔後艱○以公滅私民其允懷○無依勢作威無倚法以削寬而有制從容以和○假樂君子憲憲令德宜民宜人受祿于天保佑命之自天申之○其身正不令而行其身不正雖令不從○其行

已也恭其事上也敬其養民也惠其使民也義○君子學道則愛人小人學道則易使也○以德服人者中心悅而誠服也○若能類善物以混厚民人者必有章譽蕃育之祚○其為政也善因禍而為福轉敗而為功○增崇德政則可以轉禍為福矣○愛民者必有天報○一命之士苟存心於愛物於人必有所濟○當官者先以暴怒為戒事有不可當詳處之必無不中○有善行必有善政政善則嘉瑞臻福祥至○當官之法唯有三事曰清白慎曰勤知斯三者則知所以持身矣○除天下之害者受天下之利同天下之樂者享天下之福○教人者養其善心而惡日消治民者導之敬讓而爭自息○信在言前者不言而自喻誠在令外者不令而自行○為政以知人為先知人以清心寡欲為本○即用愛民平獄緩刑天下莫不悅喜○居廟堂之高則憂其民處江湖之遠則憂其君○治官莫若平臨財莫若廉廉平之守不可改也○事君如事親事官長如事兄待同僚如家人視羣吏如奴僕愛百姓如妻子處官事如家事然後能盡吾之心

不刑不罰感德從化○正法治國不邪枉人民○出一嘉言則士民悅

服布一善政則神人以和○為民父母當務仁化恕已育物危命濟衆○視民如子民奉猶父○弘聖教以訓民垂至仁以育物年和歲稔氣阜時昌○惟以德化感人不用鞭撻使物○弘慈悲之化緩賦而恤負行至人之教省刑而慎獄。

⑩盡力救民事君濁財勿顧邪事莫聞整雪刑獄救療人民動合王道自為吉人○防民之所害開民之所利○以政教化者易而必成○同言而民信信在言前也同令而民化誠在令外也○大政不險故民易道至治優游故下不賊至忠復素故民無偽匿○愛人即無怨刑知人即無亂政○法令正於上百姓服於下○去心志省刑罰反清淨物將自正○善為政者積其德德積而民可用也○除刻削之法去煩苛之事○聖人因人性而設教觀風俗以為治○恃道化而不恃智巧○教明於上化行於下民有耻心○御之以道則民附養之以德則民服無示以賢則民足無加以力則民朴○政有得失見於灾祥隨事而應凶有差忒○操之以誠行之以簡待之以恕○吾道不窮○正刑脩德去私戒盈百福日至矣○法

正天心順官清民自安

感應

漢魯恭字仲康扶風平陵人也。自幼習魯詩。為諸儒所稱。後舉直言。拜中牟令。恭專以德化為理。不任刑罰。訟人許伯等爭田。累守令不能決。恭為平理曲直。皆退而自責。輟耕相讓。亭長役人借牛而不還者。牛主訟於恭。恭令歸之。再三不從。恭歎曰。是教化不行也。欲解印綬去。父老涕泣留之。亭長乃慙悔。還牛。恭貫不問。於是吏人信服。建初七年。郡國螟傷稼。獨不入中牟。河南尹袁安聞之。遣仁恕掾肥親往廉之。恭隨行阡陌。俱坐桑下。有雉過止其傍。傍有童兒親曰。兒何不捕之。兒言雉方將雛。親瞿然而起。與恭訣曰。所以來者欲察君之政迹耳。今蟲不犯境。此一異也。化及鳥獸。此二異也。豎子有仁心。此三異也。遂歸以白安。是歲嘉禾生。恭便坐廷中。後拜侍御史。年八十一卒於家。子謙為隴西太守。謙子旭官至太僕。

漢卓茂字子康。南陽宛人也。習詩禮。及歷筭究極。稱為通儒。初辟丞相府。史事。嘗出行。有人認其馬。茂問曰。子之馬幾何時。對曰。月餘日矣。茂知其

謬嘿解與之挽車去。顧曰：「若非公馬，幸至丞相府歸我。」他日馬主別得亡者，乃詣府送馬，叩頭謝之。性不好爭如此。後遷密邑令，勞心諄諄，視人如子，舉善而教，口無惡言。吏人親愛而不忍欺之數年，教化大行，道不拾遺。平帝時，天下大蝗，河南二十餘縣皆被其災，獨不入密縣界。太守按行，見乃服之。後遷為京部丞，密人老少皆涕泣隨送。

漢蔡茂字子禮，河內懷人也。哀平間，以儒學顯，拜議郎，遷侍中。遇王莽居攝，以病自免不仕。光武時，復徵拜議郎，遷廣漢太守。有政績，時陰氏賓客在郡，多犯吏禁。茂輒糾案，無所回避。光武嘉之，嘗夢坐大殿，極上有三穗，禾茂，跳取之，得其中穗，輒復失之，以問主簿郭賀。賀離席慶賀曰：「大殿者，宮府之形像也，極而有禾，人臣之上祿也。取中穗，是中台之位也。於字禾失為秩，雖曰失之，乃所以得祿秩也。袞職有關，君其補之。」旬月而徵茂為司徒，在職清儉，匪懈。年七十二卒。

漢楊統，建中初為彭城令，多有美政。在縣休徵時序，風雨得節。嘉禾生於庭，時大旱，太守宗湛使統為郡求雨，即時降澍。後位至光祿大夫，為國三

老。年九十卒。子厚為循吏有名。

漢。宋均字叔庠。南陽人。二十餘補夜陽長。人皆安之。遷上蔡令。多政績。拜九江太守。郡多虎暴。數為民患。常募設檻穽。而猶多傷害。均到。下記屬縣曰。夫庠豹在山。鼃鼃在水。各有所托。江淮之有猛獸。猶北土之有雞豚。今勞動張捕。非憂恤之本也。其務退姦貪。思進忠善。可一去檻穽。除削課制。其後言庠相與東游。度江而去。中元元年。山陽楚沛間多蝗螟。其飛至九江界者。輒東西散去。由是名稱遠近。百姓頌之。

唐羅珣。會稽人。為廬州刺史。民俗病者。舍醫藥。禱淫祠。珣下令止之。捐已俸給藥。以濟貧者。民皆德之。又脩學。勸士。務崇其本。三年。政化大洽。芝草生於庭。白雀數十巢於坐側。節度使杜佑上治狀。賜金紫服。尋遷京兆尹。轉太子賓客。

唐韓愈。為潮州刺史。初至潮。問民疾苦。皆曰。惡溪有鱷魚。食民畜產。民以是窮。數日。愈自往視之。祭以一羊一豚。投溪水而祝之曰。昔先王之有天下。余蟲蛇惡物之為民害者。今天子無有四海。受民如赤子。命刺史來

守是升。升，鱷魚。乃據食民畜，熊豕以肥其身。與刺史爭為長雄，不可也。今與鱷魚約，盡三日其率醜類南徙于海。不然，是冥頑不靈。刺史則選材技民，操強弓毒矢，盡殺乃止。其無悔。是夕暴風震雷起溪中，數日水盡涸。西徙六十里。自是潮無鱷魚之患。人感公之德。初，潮人不知學。公興起學校。由是多士彬彬。政教大行。後召拜國子祭酒。長慶四年卒。潮人思公之深，立廟歲時享之。

齊張華原，公直有信行。為兗州刺史。下車之初，獄有繫囚千餘人。華原料簡輕重，隨事決遣。至年暮，惟重罪者數十人，各給暇五日。曰：期盡速還也。囚曰：有君如是，何忍背之？依期畢至。先是州有猛獸為暴。自華原臨政，州北七十里甌山中，忽有六駮食猛獸，咸以為政化所感。卒于官。州人大小踴慕，為樹碑立祠，四時祭焉。

隋辛公義，隴西狄人也。為岷州刺史，有善政及民。合境之內呼為慈母。遷并州刺史，下車先至獄中，因露坐牢側，親自驗問，十餘日決斷咸盡。人服其明。後有爭訟者，鄉里父老相曉示曰：此蓋小事，何可煩勞使君？訟者多

兩讓而止。時山東霖雨。自陳汝至于滄海。皆苦水災。境內犬牙獨無所損。山出黃銀。獲之以獻。詔水部郎婁勗就其所禱焉。乃聞空中有金石絲竹之音。仁壽元年。轉揚州道黜陟使。所至多有政績。

隋豆盧勸字定東。周武帝時。轉渭州刺史。甚有惠政。華夷悅服。德澤流行。大致祥瑞。鳥鼠山。俗呼為高武隴。其下渭水所出。其山絕壁千尋。由來乏水。諸羗苦之。勸馬足所踐。忽飛泉湧出。有白鳥翔止廳前。乳子而後去。又白狼見於襄武。民為之謠曰。我有丹陽。山出玉漿。濟我民夷。神鳥來翔。百姓因號其泉為玉漿。

宋范大錄。初為蘭溪縣吏。行案公平。不撓法以求賂。雖貧窶甘心焉。中年無子。因近監司至白砂。收一流離女子。後生一男。官至少卿。生二子。一為郎官。一為提舉。諸孫相繼登第。餘以恩授官者甚衆。後大錄追贈正議大夫。人之處心。可不為子孫計哉。

宋王老志。本濮州一推司。以不敢棄法受賂。後遇鍾離。授以道要。遂能前知禍福。徽廟時。嘗召至。賜號洞微。

宋王昌遇本潼川一推司不敢棄法受賂讞獄多所平反後遇異入山修道為上帝收錄白日上昇

宋陳公洎為開封功曹時章獻太后臨朝族人杖殺一卒公當驗屍太后遣中使十數輩諭旨吏惶懼欲以病死聞洎獨正色曰彼實冤死待我而伸柰何懼罪而驗不以實乎爾曹勿與吾留任咎乃自為牘以白府尹程琳琳大喜曰官人用心如此前程非琳所及亟索馬入奏雖大忤旨而公論歸之既而太后原其族人公亦不及罪後洎夢卒告曰陰司以公為政公忠已注公當貴顯及與公賢子孫我受公之恩故來相告自此遂顯名不數年歷官臺省終于三司副使其孫傳道履常皆以詞學顯仕為一時聞人

漢孟嘗為合浦太守郡俗採珠以易米時二千石貪穢求珠自入一珠忽徙去合浦無珠餓死者盈路孟嘗至教化大行一年後去珠復還

漢劉昆為江陵令有德政民有火災昆向火叩頭即大雨反風火遂自後遷弘農太守虎渡河北去詔問之昆曰此偶然耳帝曰此長者之言知卿

有德以感之耳。尋加遷擢。

漢劉文饒名寬。少好道。舉方正。稍遷南陽太守。視民如子。怒不形顏。口無疾言。行陰德。拯救寒困。民悅之。如父母。後為司徒太尉。年七十三。一日遇青谷先生。降於寢室。授以投解法。將去。入太華山。行九息。服氣。又授以鑪火丹方。修之道成。在洞中作童。初府師上侯主始學者。

宋仙井監蘭池鄉民鮮于述。因病誤服藥。病且亟。恍忽不知人。見三青衣吏持檄來追。別有三白衣者。囑於梁上。述命其家焚紙錢祝之。曰。有子買藥未還。願延湏臾。三人喜。載錢以出。至暮子歸。三人從以入。述遂死。與二白衣同行。蓋亦就逮者。一曰蝮充。一曰稅中。定行以之。入大城門。闕三重。宮室甚壯。遇故人曹惟吉。先死數歲矣。問述來故。述曰。被追至此。不知何也。曹賀曰。有鄉人在。可勿憂。曰。誰耶。曰。虞太傅。令判更生道。明日為更生佛矣。宜速往。少焉吏引入殿下。王者旒冕坐其上。先呼中定。及充相去頗遠。不知所云如何也。既而問述平生脩何善。對曰。家貧無力。但嘗遊瓦屋山。信辟支佛。端色甚潔。乃以一木施天翁堂耳。吏與紙筆。使錄所言。持以

上王。王書其後曰。放還速於庭。回數步。聞有呼之者。王臨階語曰。為我報家人。令設更生道場。且誦更生佛名。語畢。白光騰上。室宇赫然。速又拜而出。至大樓閣下。望題榜。綠牌金字曰。大慈大悲更生如來。纔出門。即甦。妻子正哭泣。且觀將歟矣。時紹興十八年六月二十六日也。明日奔詣虞氏。述所見。適虞公小祥。曰。云。虞名祺。字齊年。平生未曾讀佛書。每曰。誠者天之道。思誠者人之道。其至則一也。吾知此而已。嘗為夔潼蒲方軍興時。諸道以聚斂為先務。虞專意惠利及民。所部獨晏然不擾。最後在潼川。德政亦然。當紹興十七年。屬微疾。至六月二十七日。憑几不語。忽睨坐客曰。古佛俱來。吾亦歸矣。子允文旁泣下。又顧曰。身得為佛。有何不可。客異其言。已含笑而逝。及述事傳。然後虞成佛之證益顯。亦其平生為政公恕有德以致之也。

宋張逸。字大隱。滎陽人。進士及第。知襄州鄧城縣。有能名。後徙青神縣。負不自給。王嗣宗假俸半年。使辦裝。既至縣。愈加廉謹。愛民如子。興學校。教生徒。後邑人陳希亮。楊異相繼登科。縣東南有松栢灘。春夏暴漲。多覆舟。

逸禱于江神。不逾月。灘為徙五里。時人異之。累遷以樞密學士。知益州。時至有美政。人以為神。

元許維禎。字周卿。遂州人。為淮安總管府判官。不務苛刻。人頌其德政。屬縣鹽城及丁溪場。有二虎為害。維禎默禱于神祠。一虎去。二虎死祠前。境內旱蝗。維禎禱而雨。蝗亦息。是年冬無雪。父老言曰。冬無雪。民多疾。柰何。維禎曰。吾當為爾禱之。已而雪深三尺。朝廷知其有德。詔褒美之。

元田滋。字榮甫。開封人。公直有德行。居官以廉能稱。累遷浙西廉訪使。屬縣尹張或。被誣以賕獄。成滋審之。但俛首而泣。滋疑之。明日齋沐詣城隍廟。曰。張或坐事有冤狀。願神相滋。明其誣。守廟道士進曰。曩有王成等五人。同持誓狀到祠焚祝。火未盡而去之。燼中得其遺藁。今藏於壁。豈其入耶。視之果然。明日詰之。成等不服。因出火中誓狀。皆驚愕。伏罪。張或得釋。十年改濟南路總管。尋拜陝西參知政事。時陝西不雨三年。道過西嶽。曰。禱曰。滋奉命來參省事。而安西久不雨。民飢而死。滋將何歸。願神降甘澤。以福黔黎。到官果大雨。歲登。民悅。公之德。卒于官。封開國郡公。

元。卜天章字君章。洛陽人。皇慶初。為歸德知府。興學校。復河渠。河患遂息。民賴以安。改饒州路提管。民飢。即發廩賑之。僚佐持不可。天章曰。民飢如是。必俟得請而後賑。民且死矣。失申之責。吾獨任之。竟發粟賑之。民賴以全活。火延燒饒之東門。天章具衣冠向火拜。勢遂息。鳴山有虎為暴。天章移文山神。立捕獲之。以治行第一。陞廣東廉訪使。嶺南地素無水。天章至。始有冰。人謂其政化所致云。

元。觀音奴。居新州。泰定四年進士。知歸德府。廉明剛斷。發糶如神。民有銜冤數十年前事。皆千里奔走來訴。立為剖決。亳州有蝗食民禾。觀音奴以事至亳。民以蝗訴。立取蝗向天祝之以水研碎而飲。是歲蝗不為災。後陞都水監官。

元。劉秉直。字清臣。大都武清人。為衛輝路提管。平徭役。興教化。恤孤獨。賊劫汲縣民張聚鈔一千二百錠而殺之。賊不獲。秉直具詞禱城隍神。而使一人伺于死所。忽有村民阿蓮者戰怖仆地。具言賊之姓名。遂正其罪。秋七月。虫螟生。民皆患之。秉直禱于八蜡祠。虫皆自死。歲大飢。人相食。出俸米。

食之。病者藥。死者與棺以葬。天不雨。禾且稿。秉直詣城北太行之蒼峪神祠祝之。有青蛇蜿蜒而出。觀者異之。辭神而還。行及數里。雷雨大至。

嘉言

傷 欽哉。欽哉。惟刑之恤哉。○刑期于無刑。民協于中。時乃功。○惟敬五刑。以成三德。○哲人惟刑。無疆之辭。屬于五極。咸中有慶。○刑德合於時。則生福。詭則生禍。○欽恤庶獄。務在於寬。○為官刑獄為要。治獄寬恕為先。○刑主殺德主生。則修德莫若好生也。○治獄多陰德。而知其子孫必興。○法貴簡而能禁。罰貴輕而必行。○死者不可復生。用法務在寬簡。○不加刑於典法之外。不虧恩於德令之內。則受責者莫得興怨。荷貸者咸感自新。所謂威之斯懲。宥之斯感。懲以致理。感以致和。○刑者聖人所以愛民之具也。其禁暴上殺之意。必本乎至仁。

釋 普斷諸暴虐。刑獄皆止措。惇獨恣安隱。○以法理之可護者護。可責者責。應遣者遣。治以正法。人民安寧。○刑其可刑。罰其可罰。脫刑罰不中也。雖頃財奉佛。何以益乎。○議獄緩死。皆大肆赦。生育之恩。篤矣。仁愛之道。

盡矣。

①誅者不怨。罪之當也。○惟正身待物。不廢公道。猶車行陸。舟行水。無往而不通。有陷於不平者乎。○法寬刑緩。囹圄空虛。○平而不阿。明而不苛。○垂念冤結。務從輕刑。治獄稱平。

感應

漢于公。東海郅人。為縣獄史。郡決曹。決獄平。凡犯法者。于公決之。一無枉曲。百姓為之生立祠。東海有孝婦。無子守寡。侍其姑甚謹。姑欲嫁之。終不肯。姑告隣人曰。孝婦養我勤苦。哀其無子守寡。恐我累及孝婦。柰何。若無我。則必嫁。其後姑自經死。姑女告官。婦殺我母。吏捕孝婦下獄。孝婦自誣服。具獄上府。于公以為此婦養姑十餘年不嫁。何肯殺姑。太守不聽。于公爭之不能得。乃抱其具獄哭於府上。因辭疾去。太守竟論殺之。郡中枯旱。赤地千里。後太守至。卜筮其故。于公曰。孝婦不當死。前太守強斷之。其咎在此。於是太守自祭孝婦冢。因表其墓。天立大雨。歲大收。郡人以此大敬重于公。其門閭壞。父老方共治之。于公謂曰。少高大門閭。令容馬馬高蓋。

車。我治獄多陰德。未嘗有寃。子孫必有興者。至宣國為丞相。永為御史大夫。封侯傳世云。

漢郭躬字仲孫。潁川陽翟人也。家世衣冠。父弘習小杜律。太守寇恂以弘為決曹掾。斷獄至三十年。用法平恕。為弘所決者。退無怨情。郡內比之東海于公。年九十五卒。躬少傳父業。後為郡吏。辟公府。召入議獄。遷廷尉正。坐法免。後三遷。元和三年。拜為廷尉。躬家世掌法。務在寬平。及典理官。決獄斷刑。多所矜恕。乃條諸重文。可從輕者四十一事。奏之。事皆施行。著于令。躬奏讞法科。多所全活。中子暉明法律。至南陽太守。政有名迹。弟子鎮少脩家業。辟太尉府。再遷。延光中。為尚書。及中黃門。孫程誅中常侍江京等。而立濟陰王。鎮率羽林士。擊殺衛尉閭景。以成大功。再遷尚書令。太傅三公奏。鎮冒犯白刃。手劒賊臣。姦黨殄滅。宗廟以寧。功比劉章。宜顯爵土。以勸忠貞。乃封鎮為定潁侯。食邑二千戶。拜河南尹。轉廷尉。免。永建四年。卒於家。後數世皆傳法律。子孫至公者一人。廷尉七人。侯者三人。刺史二千石。侍中郎將者二十餘人。侍御史正監平者甚眾。

宋王縉為兩路提刑。每斷死囚。必焚香奏天。然後行下。一日暮坐。恍見一神人。雲冠絳服。手持數公案。又見一玉女。長帔大袖。手持一角公文。立于簷前。遙告縉曰。此汝平生所奏事目。一一皆合情法。無有枉濫。上帝嘉汝。已為汝父延壽一紀。兼為汝倍增福矣。汝之二孫。異日亦皆當作監司。更宜自勉。言訖而沒。後果如其言。

宋歐陽觀。廬陵人。文忠公脩之父也。有學行。嘗為泗綿二州推官。留心於讞獄。惟恐不得其情。嘗夜燭治官書。屢廢而歎。夫人鄭氏問之曰。此死獄也。我求其生不得爾。夫人曰。生可求乎。曰。求其生而不得。則死者與我皆無恨也。矧求而有得耶。以其有求而得。則知不求而死者有恨也。夫常求其生。猶失之死。而況常求其死也。時文忠公纔三歲。回顧乳者方抱之。立于旁。因指而歎曰。術者謂我歲在戌將死。使其言然。吾不及見兒之立也。後嘗以我言告之。明年祥符庚戌果卒。文忠既成立。夫人嘗告以此語。且曰。吾知汝父之必將有後也。厥後文忠果登第。列官于朝。為龍圖閣直學士。入副樞密。遂參政事。朝廷推恩。褒其三世。追封觀鄭國公。

車。我治獄多陰德。未嘗有寃。子孫必有興者。至宣國為丞相。永為御史大夫。封侯傳世云。

漢郭躬字仲孫。潁川陽翟人也。家世衣冠。父弘習小杜律。太守寇恂以弘為決曹掾。斷獄至三十年。用法平恕。為弘所決者。退無怨情。郡內比之東海于公。年九十五卒。躬少傳父業。後為郡吏。辟公府。召入議獄。遷廷尉正。坐法免。後三遷。元和三年。拜為廷尉。躬家世掌法。務在寬平。及典理官。決獄斷刑。多所矜恕。乃條諸重文。可從輕者四十一事。奏之。事皆施行。著于令。躬奏讞法科。多所全活。中子暉明法律。至南陽太守。政有名迹。弟子鎮少脩家業。辟太尉府。再遷。延光中。為尚書。及中黃門。孫程誅中常侍江京等。而立濟陰王。鎮率羽林士。擊殺衛尉閭景。以成大功。再遷尚書令。太傅三公奏。鎮冒犯白刃。手劒賊臣。姦黨殄滅。宗廟以寧。功比劉章。宜顯爵土。以勸忠貞。乃封鎮為定潁侯。食邑二千戶。拜河南尹。轉廷尉。免。永建四年卒於家。後數世皆傳法律。子孫至公者一人。廷尉七人。侯者三人。刺史二千石。侍中郎將者二十餘人。侍御史正監平者甚眾。

宋王縉為兩路提刑。每斷死囚。必焚香奏天。然後行下。一日暮坐。恍見一神人。雲冠絳服。手持數公案。又見一玉女。長帔大袖。手持一角公文。立于簷前。遙告縉曰。此汝平生所奏事目。一一皆合情法。無有枉濫。上帝嘉汝。已為汝父延壽一紀。兼為汝倍增福矣。汝之二孫。異日亦皆當作監司。更宜自勉。言訖而沒。後果如其言。

宋歐陽觀。廬陵人。文忠公脩之父也。有學行。嘗為泗綿二州推官。留心於讞獄。惟恐不得其情。嘗夜燭治官書。屢廢而歎。夫人鄭氏問之曰。此死獄也。我求其生不得。爾夫人曰。生可求乎。曰。求其生而不得。則死者與我皆無恨也。矧求而有得耶。以其有求而得。則知不求而死者有恨也。夫常求其生。猶失之死。而況常求其死也。時文忠公纔三歲。回顧乳者方抱之。立于旁。因指而歎曰。術者謂我歲在戌將死。使其言然。吾不及見兒之立也。後嘗以我言告之。明年祥符庚戌果卒。文忠既成立。夫人嘗告以此語。且曰。吾知汝父之必將有後也。厥後文忠果登第。列官于朝。為龍圖閣直學士。入副樞密。遂參政事。朝廷推恩。褒其三世。追封觀鄭國公。

宋王君貺之父。以平生仕宦。捧不安施。務從寬恕。一夕夢神語之曰。爾能慎刑。子孫必昌。後其子十八人登仕版。而君貺又為天下第一。

宋張文規字正夫。高安人。以特養名入官。再調英州司理參軍。真陽縣民張五者數輩盜牛。里人胡達朱圭。張運。張周孫等。率保伍追捕之。群盜散走。獨張五拒抗不去。達殺之。而取其貲。盜不得志。反以被劫告于縣。縣令吳邀欲邀功。盡取達圭以下十二人送獄。劾以強盜殺人。鍛鍊備至。皆自誣服。圭運二人病死。既上府。事下司理院。文規察囚辭色。疑不實。一問得其情。又獲盜牛黨以證。獄具。胡達以手殺人杖脊。餘人但等第杖臀而已。圭運乃無罪。時元祐七年也。邀計不行。恚忿歸。番嘔血死。文規雪冤。獄活十人。當得京秩。郡守方希覺以其老生無援。不為剡奏。但用舉者遷臨川丞。紹聖四年之官。明年夏四月癸卯。以驗屍感疾遂困。勺飲不入口者一月。昏不知人。家人環泣待盡。越五月辛未。忽微作聲。索水飲。身漸能動。大言曰。速差人般取舡上行李。至夜半神氣始定。乃言方病在床。聞一人呼云。英州下文字。即出視之。有公吏三四輩曰。攝官人照證事。吾告以病。薦

乏力不能行。又無公服。吏曰。彼中自有公服。已具舟岸下矣。不得已與俱往。頃刻間至英。入城視井邑人物。歷歷如舊。唯市中酒樓不見。問左右曰。焚之矣。吏止之。令少待。曰。俟取公案。須臾而回。問何等文書。曰。吳邀解胡達案也。吾念邀死已久矣。何為追我。方悟已死。稍行前。入大官府。門廡嚴峻。戈戟列衛甚整。同行者十餘人。將入門。一卒持衣冠至。服而告曰。有持水漿來者。切勿飲。飲則不得還。又前至一門。衛兵愈盛。力士數十皆執斧鉞。果有持水至者。同行皆飲。吾辭不渴。又易茶來。復辭之。其人怒曰。何為難伏事也。復前行。追者先入門。出引衆俱進。殿宇樓觀金碧相照。殿上垂簾。皆不敢仰視。潛問追者。殿上為誰。曰。王也。俄傳呼驅同行者使前。旋即猝去。殿後方及吾。聞簾內所問。果吳邀事。一一以實對。王曰。吾亦詳知。然必須卿至。然正者貴審實爾。吾奏曰。臣自勘此獄。使十人將死得生。獨不蒙朝廷賞。敢問其說。王曰。臨川丞即酬賞也。吾曰。若准賞格。當改在京官。而今但用舉者循資耳。王曰。豈有舉主二人而遽得丞大邑乎。蓋吾初得三薦章。既赴部。而廣東提刑王彭年者已不可用。不謂冥間知之。

如此之的。遂奏曰。官職既有定分。願以微功。少延壽數。即聞殿上索簿。吏抗聲云。已蒙王判。則見文書自簾出。降付衛者。引吾至所司。遙見吳邀荷校於簾前。而朱圭張運立其傍。吾借書欲觀。衛者不可。曰。至司則見矣。拍司吏曰。此濮州舉人也。行已正直。明法不第。故死。得主判于此。至司。揖吏問所判。吏出示紙尾。有漆一紀三字。吾佯為不曉。以問吏。吏曰。子宿學老儒。豈不曉一紀之義乎。一紀者十二年也。子有雪活十人之功。故王以一紀報子。此人間希有事也。適在王所。聞子應對。王甚喜。失上帝好生而惡殺。經云。與其殺不辜。寧失不經。又云。好生之德。洽于民心。凡引此類數十端。不能盡記。吾從容謂之曰。公本貫濮州邪。吏愕曰。何以知之。吾笑曰。平生聞濮州大鍾。果有之乎。吏作色曰。此非戲所。勿輕言。復引出至殿下。叩簾奏訖。吏舉手令退。吾又前白曰。適蒙判增一紀。今六十七矣。計所增當至七十九。然先父壽止七十八。豈有人子而壽過其父乎。王曰。不然。人壽短長。係乎所脩。父子雖親。不必同也。遂拜謝而出。廊下一大門。守衛嚴密。吏曰。都獄門也。其間各有獄。凡貪淫殺害。嚴刑酷法。讒譖忠良。毀敗善類。

不問貴賤久近。俱受罪于此。欲入觀不可。望見門內一僧持磬。吏曰。導莫和尚也。凡人魂魄。皆此僧導引。廊上有欄楯。如州縣所謂沙子者。其間囚亦多。一女子年十七八。呼曰。聞官人得歸撫州。煩為白知州許朝散。云十二娘至今未得生天。願營功果。救拔我。朝散將來亦解保舉官人。吾默思許今年舉狀已盡。安能及我。俄聞傳呼張文規與罪人通語言。驅至王所。王問焉。以實告。王曰。能為言之。理無所礙。彼此當有利益。吾遂行。恐忘女子之言。又至司。就吏借筆書十二字於臂。急趨出。見元退者引登舟。行至一城。乃南雄州也。有青衣來報。方提舉已死。追至此。蓋英守方希覺者。見提舉江西常平。吾猶意其在英時。不保奏鞫獄事。走卒妄言。悅我以求利。詰其所在。曰在某所。往求之。不見。復登舟。即抵岸。送者推出船。遂宿。視臂間十二字。隱隱若存。時病已經月。腰胯間肉壞見骨。善醫者以水銀粉傅之。肌肉立生。許朝散者。臨川守。許中復也。十二娘者。乃其兄之女。聞其事。為誦佛書。飯僧薦之。而方希覺者。以文規甦後始死。蓋氣未絕時。精爽已逝矣。文規在告。幾百日。漕司以為不勝任。檄郡守體量將罷之。許守具事。

實保明。病已愈。堪整務。乃悟女子所謂保舉。及王言彼此利益之說。後有客自英來。云市樓果為火所焚。明年文規以通直郎致仕。大觀二年七十八矣。夢一羽衣來云。向增壽一紀。今數足矣。陰君以公在英州嘗權司法。斷婦人曹氏斬罪。降作絞刑。又添半紀。文規寤而思之。曹氏者本罪當斬。欲全其首領。故以處死。定斷既去官。刑部駁問以為失出。偶事在赦前。又曹氏已死。無所追正。但索印紙批書而已。政和四年乃卒。年八十三。考其再生及夢。凡增一紀有半。當得十八年。而只十六年者。蓋自生還之歲。至得夢時。首尾為一紀。又自夢歲至終年為半紀云。

漢盛吉。字君遲。為廷尉。決獄無冤滯。每至冬。罪囚當斷。其妻執燭。吉持丹筆。夫妻相對垂泣。妻語吉曰。君為天下執法。不可使人濫罪。殃及子孫。視事十二年。天下稱其平恕。廷樹勿心。有白鵲來止其上。乳雛連年不去。人為祥。後吉生三子。皆仕州郡。

宋趙稹。為益州路轉運使。蒲江捕盜不得。反繫平民數十人。楚掠強服。稹辨其冤。釋之。天久陰雨。忽晴霽。郡人歡呼滿道。後進位少師。

漢汝南何比干。通律法。元朔中。公孫弘辟為廷尉。右平獄無冤民。號曰和公。征和初。去官在家。天大陰雨。晝寢。夢有過客車騎。覺而有老嫗年八十餘。頭盡白。求寄避雨。雨方盛。而嫗衣履不濡。比干異之。延入坐。湏臾雨止。嫗辭去。出送至門。乃謂比干曰。君先出自后稷佐堯。至晉有陰德。及公之身。又鞠獄平恕。今天賜策以廣公子孫。佩印綬符。狀如簡。長九寸。凡百九十枚。以授比干。曰。子孫佩印綬者。當隨此筭。嫗東行。忽不見。比干年五十八。有六男。後三歲復生三男。徙平陵。八男去。一男留。常祭嫗於東行。及遣令東首。自比干已下。累世為名族。子孫榮盛。皆符老嫗之言。

漢袁安為楚相。會其王坐事卒。相牽引拘繫者千餘人。囚皆自誣。歷三年而獄不決。坐掠幽而死者百餘人。天用炎旱。赤地千里。安授拜。即控轡而行。既到決獄事。人人具錄辭狀。本非首謀。為王所引。應時理遣。一日之中。延千人之命。其時甘雨滂沛。歲大豐稔。

唐顏真卿為監察御史。充河西隴右軍。覆屯交兵使。五原有冤獄久不決。真卿立辨之。天久旱。及獄決。乃雨。郡人呼御史雨。

宋崇寧間孫立節為桂州節度判官。時謝麟經制溪洞事。宜州守王奇與蠻戰死。公被旨鞠吏士有罪者。謝因收大小使臣十二人付公。并欲盡斬之。公持不可。謝以語侵公。公曰。獄當論情。吏當從法。逗撓不進。諸將罪也。既伏其辜。其餘可盡戮乎。若必欲非法斬人。則經制司自為之。我何預焉。謝即奏公抗拒。公奏謝侵獄事。刑部議如公言。十二人皆得不死。其後公遷官進秩。子二人皆舉進士。遂至大貴。初公未拜官時。嘗夢神人語之曰。桂州事待公來明辨曲直。公甚訝之。至是果符所夢。蓋神以公平生正直不欺。故先告之。其享報也宜哉。

宋楊提舉初為越之錄事參軍。會太守禁盜甚嚴。凡保內有賊。不即捉赴官。而民家所失物皆保正長倍填之。一日有盜入民家。而主覺知。持白棒趕賊。一打仆地。遂執付保長。保長為其所苦。遂縛以木刀擊之。因而致死。其保長自認打殺。更不抵諱。獄具。公因閱案驗狀。有左肋下一痕。長寸二分。中間有白路一條。公疑是背後趕打。此一痕乃致命處。恐非保長所打。獄吏力爭。以為案已圓成。公執不聽。遂追元捕賊之人問。果得其情。及索。

到白棒。首有裂路。方知是捕賊人打之。引法以登時打殺罪止於杖。保長遂免死。其家感德。畫公像供養以祝壽。後公二子登進士第。官皆至大中大夫。人謂公陰德之報云。

宋紹興乙卯。鄭承議為越之蕭山丞。有朱統制在縣牧馬。侵打西興塩場草。塩司申請朝廷降黃榜止約。許人格捕。其卒打草如故。為塩亭戶殺傷四人。統制與其卒議曰。若不得西興草。則馬不可牧矣。於是醵金囑案吏止作因言氣鬪殺亭戶八人。皆合償命。案成。知縣已簽訖。次呈縣丞。公乃詰案吏曰。黃榜在前。許人格捕殺之。其罪甚輕。今若作鬪殺結解。是本縣先自拒黃榜。解狀即不得書我名銜。案吏惶恐謝罪而去。有頃復到曰。今歸寅夜通換案卷。依元情結解。乞賜恩宥。勿令知縣知。次日賁到。前後通易作拒捕結斷。止畱知縣判。差某人與官押數字而已。亭戶八人到府各杖八十放歸。八人還家。日焚香拜天祝曰。願鄭丞有子有孫富貴不絕。後公長子預漕薦次子登第。家富盛過於昔時。

宋韓魏公琦判大名府。一日有案吏請假娶妻。繼有人訟其不法。及叅假

送獄勘正。將引斷。乃令封起公案。及半年後。一日令取前案送簽廳行遣。二倅乃白公曰。此人自封案後。頗謹愿。不為非法。乞恕前罪如何。公乃問二倅曰。二公知某封案之意乎。曰不知。公乃云。此人緣請假娶妻。繼而至訟。當時若便斷遣。必傷三家人情。此人與父母必咎其妻。而妻之父母亦不悅。所以封起案卷。今已半年矣。無可疑者。請一面行之。二倅起揖。公曰。公仁恕如此。將上天不獨厚於公。公之後世亦將貴顯無極矣。公嘗夢以手捧天者再。後果援英宗於藩邸。翼神宗於東宮。子孫蕃衍。充滿要途。宋趙清獻公抃。景祐中登進士第。為武安軍節度推官。有偽造印者。吏以為當死。公獨曰。造在赦前。用在赦後。赦前不用。赦後不造。法皆不死。遂以疑讞之。卒免死。一府皆謂公宜大顯貴。不在其身。必在其子孫。公嘗守青州時。山東旱蝗。自青齊及境。遇風迅飛。墮水皆死。後公登三府。子孫俱貴。宋張佛子名慶。京師人也。以淳化元年生。生三歲而父母俱亡。亦無伯叔昆季。遂養於外戚趙氏。洎長。因誤姓趙氏。亦未知。自明趙氏之隣。有郭榮者。世為右軍巡院吏。趙氏因以慶屬焉。郭氏告老。慶遂補郭氏之闕。實祥

符三年也。慶之司獄。常以矜慎自持。好潔獄。常日躬視掃滌。至暑月尤數。每戒其徒曰。人之罹于法。豈得已哉。我輩以司獄為職。若不知重。則罪者何所赴訴耶。飲食湯藥。卧具必加精潔。常為其徒侮之曰。若區區為此。乃欲要福乎。慶亦莫之顧也。好看法華經。每有重囚就戮。則為之齋素誦佛。一月乃止。囚有無辜者。輒為之解釋。嘗為好言教獄囚。果有罪當自認。毋誣良善。以重已過。不訊考而疑獄常決。獄官往往屬意焉。其妻袁氏年四十八。景祐五年京師疫。袁氏染疾而斃。已三日矣。尚未殮也。忽然起坐不語。眾觀以為更生。踰時遍體流汗。遂甦。因告其家屬曰。我始行至一所。穢污所聚。不覺身在其間。乃起念欲得一清涼處。忽見一白衣端嚴脩長。謂袁氏曰。汝不當在此。何為而來。急去急去。汝夫陰德甚多。子孫當有興者。汝今尚未有嗣。胡為來此。言未終。白衣人乃以手提袁氏之足。拋出穢污。遂乃復甦。袁氏自念常事白衣觀音精虔。必其感應。自是里巷人相與言曰。信乎趙佛子。乃獲陰報也。其後族人因告慶曰。爾本張姓也。乃述其始末。因復其姓張焉。慶年八十二。一夕無疾而卒。袁氏更生之明年。生子享。

享生三日。有一道者丐於慶之門。慶因延入。不復詢其姓名。既坐。謂慶曰。若本無嗣。今乃聞嬰兒聲。非若子乎。慶曰。今四十九歲。止有二女。三日前偶得一子。道者曰。信乎。陰功未易量也。爾必積累善事。非一朝一夕。聽嬰兒聲。不獨爾之有嗣。又喜子孫有文學者相繼而出也。爾善保之。飯訖而去。享既長。記名於門下。省授三班借職。生六子。皆讀書至顯官。京師號為世族。

晉潁縣令甚平恕。民有姚牛者。年十餘。父為鄉人所殺。牛嘗賣衣物。市刀戟圖。欲報讎。後在縣門前相遇。手刃之於衆中。吏捕得。縣令深矜孝節。未忍遽決之。既而遇赦。又為州郡論救。遂得無他。令後出獵。逐鹿入草。草中有古深井。數處。馬將趣之。忽見一翁舉杖擊馬。馬驚避。不得及鹿。令怒。引弓將射之。翁曰。此中有井。恐君墮耳。令曰。汝為何人。翁長跪曰。民姚牛之父也。感君活牛。故來謝。因忽不見。令歎曰。吾平生未嘗欺心妄行。凡人有罪者。必原其情。以求其實。今見是翁所云。其報我者厚矣。即罷獵而還。愈加公恕。

儒克勤于邦。克儉于家。○慎乃儉德。惟懷永圖。○先知稼穡之艱難。乃逸。○位不期驕。祿不期侈。恭儉惟德。無載爾偽。○在上不驕。高而不危。制節謹度。滿而不溢。○恭者不侮人。儉者不奪人。○其辭恭。其欲儉。其祿及子孫。○恭儉畏忌。必蒙祉福。○克儉節實。弘道之源。○君子之行。靜以脩身。儉以養德。非澹泊無以明志。非寧靜無以致遠。○恭敬撙節。福之基也。驕狠傲慢。禍之始也。○上好儉。則國有餘財。下不僭。則家有剩貲。如此則天下自然富壽矣。○儉則寡欲。君子寡欲。則不役於物。可以直道而行。小人寡欲。則能謹身節用。遠罪豐家。○儉則心小而為慮者遠。侈則心大而為謀者疎。○儉德之共也。侈惡之大也。○救奢必以儉約。拯薄無若敦厚。○唯儉可以助廉。○能棄利約身。故無怨於人。○約於今者。必有重報於後。○恭儉福之興。○勤者富之本。儉者富之源。○約其身以及家。儉其家以施國。○成家之道。曰儉與勤。○脩身以寡欲為要。行己以恭儉為先。○人常咬得菜根。則百事可做。○勢不可使盡。福不可享盡。事不可做盡。言不

可道盡○身被一縷。常思織女之勞。日食三食。每念農夫之苦。

釋節身時食。清淨自活○抱素儉約。德逾高範○息緣儉務。是至人之大
量○噉蔬菜。澄心神。招慈善。感延年○衾衣惡食。約身守節○蔬藿是甘。
無求滋饌○民用儉。則易足。易足。則力有餘。力有餘。則志情泰。樂治之心。
於是生焉○量腹而食。無所積藏。度身而衣。不求餘長○金玉不貴。惟道
為珍。約已守節。甘苦樂負○我今有一襦。非羅亦非綺。夏天將作衫。冬天
將作被。冬夏通互用。長年只者是○為人常喫用。愛意須慳惜。老去不自
由。漸被他催斥○過費行。廉耻以節之○節食養胃。清心養神。口腹不節。
致疾之因。

道我有三寶。寶而持之。一曰慈。二曰儉。三曰不敢為天下先○見素抱朴。
少私寡欲○是以聖人去其甚。去奢。去泰○省事之本。在於節用。節用之本。
在於去驕○約其所守。寡其所求○守其天常。安其命義。食止充虛。衣止
禦寒。不為所得。不棄所有○取與有節。出入有量○遠聲色。薄滋味。養形
之道也○大丈夫恬然無思。澹然無慮○儉則廣。損則大○福生於清儉。

○樂道而忘賤。安德而忘貧。○無所誘慕。精神內固。○功約易成。事省易治。求寡易贍。○欲不過節。則養性知足。○靜漠恬澹。所以養生也。○不敢驕奢。故能長久。○外得失之榮辱。割厚生之腊毒。○恬愉退靜。獨善守己。○儉節則昌。淫佚則亡。○澹然無極。衆美從之。○衆人重利。廉士重名。○官上清約。則人富。官上奢縱。則人貧。○清貧常樂。濁富多憂。○遏情閉欲。以義自防。○常將有日思無日。莫待無時思有時。○簞茶淡飯。飽即休。補破遮寒。暖即休。三平二滿。過即休。不令只不如老即休。○有福莫享盡。享盡身貧窮。有勢莫使盡。使盡惡相逢。○千般巧計。不如本分為人。萬種強圖。爭似隨緣節儉。

感應

吳陸績為鬱林郡守。自奉儉約。罷秩泛海而歸。不載寶器。負舟輕用。巨石重之。中流風波橫作。一時同泛者。率多漂溺。惟有績舟安流無恙。舟中一人假寐之際。如見神人往來舟中。若護翼者。且戒舟人。毋有恐怖。舟中使君

持身清儉。不以一毫干擾於人。行通于天。所至神人護佑之。故特來相報也。既覺言之。果獲安濟。

周河內張奉。字公先。少時名激子。恬淡寡欲。其妻服飾奢麗。奉不顧眚。無異路人。婦改服。乃復成室家。後棄俗入剎。遇山圖公子。山圖公子觀其自奉清儉。有仙資。授激子九雲水。強梁鍊挂法。後脩煉得道。登東華宮。領九宮尚書。

漢龍伯高名述。京兆人。建武中為山都長。敦厚周慎。謙約節儉。從仙人刀道林。隱處方臺。師定錄君。得道成仙。

後魏高允。字伯恭。博通經史。志尚清儉。累居顯貴。不改貧賤。草屋數間。布被緼袍。朝夕所食鹽菜而已。一夕其子夢有神人告曰。尔父清儉。舉世寡儔。天帝特命賜粟千石。帛千匹。以旌之。數日元帝幸其宅。觀允所用。歎曰。古之清貧。豈有比乎。賜粟帛一如所夢之數。

唐杜黃裳為相。自持清儉。人不敢干以私。時李師古跋扈。憚黃裳為相。未敢失禮。乃命一幹吏送錢數千緡。并羶車一乘。亦直千緡。往與黃裳。使者

未敢遽送。乃於宅門伺候累日。有綠輿自宅中出。從婢二人皆青衣襍纓。問何人。曰相公夫人。使者遽歸以白師古。師古乃折其謀。終身不敢失節。初黃裳微時。窮約安於澹素。廉介屹然。嘗過山寺。寺僧恭禮甚至。黃裳素不識僧。怪而問之。僧曰。夜有司土神告我。明日杜秀才當過此。此人雅澹持正。他日位至宰相。身致太平。不可慢忽。以此知之。黃裳不荅而去。後十五年。果登相位。

唐盧懷慎。清謹貞素。不營資產。器用屋室皆極儉陋。既貴。妻孥尚不免飢寒。而為故人親戚散施甚厚。為黃門侍郎。在東都掌選事。奉身之具。惟一布囊耳。後為黃門監。兼吏部尚書。卧病既久。宋璟盧從愿常相與訪焉。懷慎卧於弊簣單席。門無簾箔。每風雨至。即以席蔽焉。蓋璟與從愿皆懷慎所器重者。見之甚喜。留連永日。命設食。有蒸豆兩甌。菜數俎而已。此外蕭然無辦。因持二人手謂曰。二公當出入為藩輔。聖主求理甚切。然享國歲久。近者稍倦于勤。當有小人乘此而進。君其志之。不數日無疾暴卒。夫人崔氏止其兒女號哭。曰。公命未盡。我得知之。公清儉而廉潔。蹇進而謙。

退。四方賂遺。毫髮不留。與張說同時為相。今納貨山積。其人尚在。而奢儉之報。豈虛也哉。及宵分。公復生。左右以夫人之言。啓陳懷慎曰。理固不同。冥司有三十爐。日夕為說鼓鑄橫財。我無一焉。惡可並哉。言訖復絕。家無留儲。唯蒼頭自鬻。以給喪事。上因校獵於城南。望墟落間。環堵卑陋。其家若有所營。因馳使問焉。還白懷慎大祥方設齋會。上因為罷獵。憫其貧匱。即以縑帛贈之。

齊武帝建元元年。太子左率張導。字進賢。道少好黃老術。每日食不過二食味。衣服不華飾。因病謂妻曰。我死後棺乏周身。殮服但取今者。慎勿改易。及導卒。男安護欲奉遺旨。妻朱氏曰。汝父雖遺言如此。且不忍依其言。因別製四時服。而殮。後一日。家人忽聞其棺中呼安護之聲。數回。家人一時驚懼。疑其反生。即啓棺。道已開目。遂扶起。卧於舊寢。因坐責妻曰。我平生素儉。柰何違言。易我故服。因自悉解其衣服。投於床下。謂男曰。復殮我故衣。又曰。但安於棺中。後三日看之。若儼然。即葬。如目開。即重生也。如戒。後三日安護乃啓棺。却見開眼。家人等皆驚喜。扶出遂生。謂男與妻曰。

地府以我平生脩德惟務儉約。無奢侈之失。故兩次放我還生。今更增壽二十五年。并加以官。導後果為建德令。壽筭如其言。

嘉言

儒求服其志。不貪其得。故以戰則克。以祭則受福。○富與貴是人之所欲也。不以其道得之不處也。貧與賤是人之所惡也。不以其道得之不去也。○不義而富且貴。於我如浮雲。○君子謀道不謀食。○仁者以財發身。○屏欲而崇德。則自然受天遐福。○存心盡公。神明自祐。○清心寡欲。增厚福基。○知足常足。終身不辱。知止常止。終身無耻。○正其誼。不謀其利。明其道。不計其功。○知足則樂。務貪則憂。○安分身無辱。知幾心自閑。

釋不貪人財。是故富樂。○知足之人。雖貧是富。○少欲之人。無求無欲。○知足者。貧賤亦樂。不知足者。富貴亦憂。○勿貪。○無弊。色聲香味觸也。若貪著生愛。則為所燒。○斷絕貪欲。乃得滅苦。但當作福。以求道真。○離欲及貪愛。定成天人師。○終以不貪。賢者識真。○若欲脫諸苦惱。當觀知

足知足之法。即是富樂安隱之處。○少欲省事。無復經營之憂。乞士任緣。寧有積藏之累。○攝心守正。泊然無想。此最為樂。○心不貪欲。為十善之本。故能俯絕地獄。仰生天堂。○利不苟貪。終禍少。事能常忍。得身安。

道大盈若冲。其用不窮。○知足不辱。知止不殆。可以長久。○不貪無用。即不以欲害性。○貪鄙不生。忿爭乃息。○去其誘暴。除其嗜欲。○不貪富。何羨貨。此謂順民也。○君子思義而不慮利。○知養生之和者。不可懸以利。通內外之符者。不可誘以勢。○不利化貨財。不貪世名。不以貴為安。不以賤為危。○耽玩靜真。淡泊守固。○去聲色。禁嗜欲。寧身軀。安形性。○定心寡欲。可以服鬼神。○不以欲傷生。不以利累己。故不違義而妄取。○財不貪。無所害。酒不貪。無所觸。○妙藥難醫。冤債病。橫財不富。命窮人。虧心折盡。平生福。行短天教。一世貧。

感應

漢楊震字伯起。弘農華陰人。父寶。哀平之世。隱居教授。震明經博覽。無不窮究。諸儒為之語曰。關西孔子楊伯起。常客居於湖。不荅州郡禮命。數十

年。衆人謂之晚暮而震志愈篤。後有冠雀銜三鱸魚飛集講堂前。都譚取魚進曰。蛇鱸者。卿大夫服之象也。數三者。法三台也。先生自此升矣。五十乃始仕州郡。後舉茂才。遷荊州刺史。東萊太守。當之郡。道經昌邑。故所舉荊州茂才王密。為昌邑令。謁見。至夜懷金十斤以遺震。震曰。故人知君。君不知故人。何也。密曰。暮夜無知者。震曰。天知。神知。我知。子知。何謂無知。密愧而出。後轉涿郡太守。震性公廉。不受私謁。子孫常蔬食步行。故舊長者或欲令為開產業。震不肯。曰。使後世稱為清白吏子孫。以此遺之。不亦厚乎。元初四年。徵入為太僕。尋拜太尉。年七十餘卒。遺令以雜木為棺。布單被。裁足蓋形。朝廷嘉其忠。賜葬華陰潼亭。遠近畢至。先葬十餘日。有大鳥五色。高丈餘。兩翼長二丈二尺。人莫知其名。來止庭樹。下地安行。到柩前正立。俯仰悲鳴。淚下霑地。衆人更共摩撫抱持。終不驚駭。葬畢。乃飛去。郡以狀上。下詔令太守具中牢祠之。時人立石象鳥於其墓。以昭其靈感。子孫世為顯宦。

宋呂蒙正字聖功。未第時甚貧窶。讀書僧寺中。所居之室夜常有光。僧以

為蒙正之祥。禮待甚厚。蒙正亦自數見光。不以為恠。夜夢白衣老人拍坐榻下。語蒙正曰。此有厚藏。君當取之。既覺。了不留意。一日鼠穿榻下地。榻沉陷焉。蒙正躬治地安榻。見黃金一器。白金二器在下。蒙正覆之如故。不取之。亦不言也。後登第。累官至左補闕。知制誥。僧求施錢。營造佛寺。佛像蒙正曰。故時榻下有藏。可副所需。僧往發之。資用悉充。乃大德蒙正。每旦於佛前焚香祝之。願蒙正及子孫世世顯貴。後蒙正果登宰輔。子從簡。惟簡承簡。行簡務簡。居簡。知簡。比為顯官。其家世世貴顯不絕。

唐李景讓母鄭氏。性嚴明。早寡家貧。居于東都。諸子皆幼。母自教之。宅後古墻。因雨隕陷。得錢盈舡。奴婢喜告。母往焚香祝之曰。吾聞無勞而獲身之灾也。天必以先君餘慶。矜其貧而賜之。則願諸孤他日學問有成。乃其志也。此不敢取。遽命掩而築之。三子景讓。景溫。景莊。後皆舉進士第。景讓官至太保。鄭不貪婪。而三子鼎貴。天報豈啻哉。

唐周頌者。天寶中進士登科。授慈溪令。在官清廉有守。忽夜暴卒。為地下所司追至一城。其人將頌見王。門外忽逢吉州刺史梁乘。乘問頌何以至。

此地獄耶。初頌雖死。意猶未悟。聞說地獄。心甚悽然。因哽咽悲涕。白乘云。毋老子幼。漂寄異域。柰何而死。乘曰。冥司善惡之報。甚公。以君平生為政。清謹。不欺心。貪財。當不至死。宜暫見王。問則具言之。必嘉君之行。慎無自苦也。有頃。使者引頌入見王。王形貌甚偉。頭有兩角。問頌曰。公作官。不橫取人財否。頌云。身是平時進士出身。官至慈溪縣令。儉約自守。未嘗非理受財。王曰。吾固知之。但公壽數當盡。故追至此。今嘉公立心清慎。宜增壽筭。可即還家。頌再拜辭去。乘甚喜云。王已相釋。理可早去。頌云。道路茫昧。何爾歸去。乘令原追人送頌。行數里。其人大聲叫云。秀才秀才。使我不去送迎。如是。獨不解一言相訓。行十餘里。至一石井。遂推頌落井而活。自是愈加廉謹。歷數任。年七十無疾而終。

唐衢州范元之。素貧。篤志讀書。盛暑浴于水邊。拾得金銀一袋於岸。歸謂其子曰。世人以財為命。萬一彼失此者。自經於溝壑。枉喪性命。將如之何。翌旦。父子携於岸待之。果有一婦。悲號而至。元之詰其故。曰。夫坐獄當死。易田得銀。至此失之。元之即以還之。婦分與。亦不受。既而鄉里年少無知。

者反謂其不能取銀經營生理。空自守貧。元之笑而不答。因自歎曰。吾平生安分不貪。豈可圖他人之財。以厚於己。而汙吾之名哉。識者賢之。是年其室產紫芝數莖。光彩燁燁。人知其為祥瑞也。明年父子果登第。歷十二世皆為郡守。

宋葉丞相夢鼎。淳祐戊申。知袁州。仁慈廉謹。任滿得替。士民攀轅卧轍。以留之。旗幟甚盛。於內綵旗有一聯云。關節一毫無地入。公廉兩字只天知。隨後吏人挿於歸舟。過袁河口。大江中忽大風掣去。衆見直上雲霄。在空中飛舞。亦不見其墜。此豈非公廉只天知之驗歟。

宋楊中奉存。吉水湓塘人。元豐八年赴省。宿息州旅舍。既卧覺床席間有物礙其背。揭而視之。乃鹽鈔二萬引。明日詢主人曰。前夕何人宿此。主人曰。淮甸一巨商某姓名也。公曰。此吾故人。設其人回。可與之言。吾在某坊某人家安歇。又大書于所宿之房曰。某年月日廬陵楊存寄此。遂行。不數日商人果從故道處處物色之。至息邸。主人以公言告。且使自觀壁間所書。乃徑去。京師訪公。公曰。果汝物耶。當聞之官。以歸汝。商曰。如教。公詣府。

悉以授商。府使中分之。公力辭曰。既某欲之。前日奄為已有。泯默不言矣。商不能強。乃捐數百緡。就京師相國寺設齋。為公祈福。有彩雲天花之瑞。衆皆謂公之德所感也。是年公出焦蹈榜下。歷官至中奉大夫。子孫皆貴顯。

宋劉留臺。少極貧。專事誦謁。歲久不能自存。一日至漳泉市浴堂中。拾金一袋。浴畢。託疾卧堂中。終夕不去。翌日。有一人號泣而來。自言為商于外八年。只收得金八十五片。以一袋盛之。昨晚與同行携到此浴。浴罷垂目行三十里。始覺其金不見。劉遂舉以還之。商以數片遺之。一無所受。及還鄉人愈薄之。責以拾金不能營生。而復來相干。劉荅曰。吾平生賦分止合如此。若掩他人物以為已有。是欺心矣。必有禍灾。况商人辛勤所積。一旦失去。豈不哀哉。吾是以還之。人皆歎服其義。忽一夕夢神人告之曰。汝平生安分不貪。將有大顯。并及汝後嗣。劉曰。非某所敢望也。後果登第。官至西京留臺。子孫在仕途者二十三人。

宋樂平東關民張五郎。淳熙七年有親戚從假貨物。付以一金釵。過期不

反張自出錢往贖。輸息未足。還家遣婢雪香持所欠取之。既得釵。半途登
劍慮其墜也。插于壁間。溷畢而忘之。行百步始覺。亟回。適一弓手往來其
外。即就索焉。拒曰。未嘗見。婢泣告曰。我娘子性嚴急。此係陪錢取典。已自
忿躁。更將原物失去。必謂我與人有私。以釵與之。將痛責我。循至死地。未
可知也。遂徑趨水濱。弓手懼其赴水。遽呼曰。我實獲釵。本喜為橫財。今
乃令汝就死。我不忍也。即以還之。婢歸言其故。張歎息。語其妻曰。雪香
服事十三年矣。無分毫罪過。若因此自盡。可謂至冤。不如分付與人作
一段好事。妻以為然。併與釵以嫁十里外結竹渡邊民王二。其婦懷弓手
恩。恨不問其姓名。尚能略記其形狀。經四年。因往溪頭挈水。渡舡人已滿
載。中一人絕類弓手者。近而扣之信也。邀還家。其人辭以文書有限。若遲
一渡便阻五里。不可相從。婦力懇請與俱行。船即離岸。婦及家告其夫。方
相與啜茶間。忽聞渡所呼噪喧厲。出視之。船届中流而覆。溪漲正猛。不容
奔救。溺死者凡三十六人。惟弓手獨免。

宋南劍人林積者。少時入京師。至蔡州息旅邸。既卧。覺床席間有物逆其

背揭席視之。見一布囊。又其中得錦囊。實以此珠數百顆。明日詢主人曰。前夕何人宿此。主人云。潯陽周仲津。林曰。此人必復至。幸令來上庠相訪。汝可具吾姓名告之。數日仲津果以失珠物色至蔡邸。主人具以告之。乃起上庠訪積求之。積驗其珠數皆相符。合悉以歸之。仲津選大珠數十顆。為報。積固不受。仲津拜謝曰。公處心不貪如此。願公及子若孫。世世富貴。後積登第。官至太中大夫。子德新為吏部侍郎。其家遂世世簪纓不絕。天之報施。信可徵也。

宋郡君李氏有賢德。嘗有貨珠子老媪李氏携珠子至。既去遺珠子在地。郡君收之。後媪踰時不至。一日既至。形容枯瘦。精神恍惚。非昔時也。郡君詰之曰。向時所貨珠子。歸則失去。告其主以金十兩償之。其主下許。因憂愁感疾。幾不能起。郡君曰。珠子當時遺在地。我得之。今在此。媪驚喜涕下。願致金六兩以請。郡君取還之。金不受。忽微疾。夢乘車出曠野。至大官府。見二偉人衣冠坐堂上。引至堂下。偉人方問姓氏。郡君知其陰府。遂誦大悲呪。左右皆驚愕。其堂搖動不已。二偉人立語曰。勿誦放尔歸矣。一吏

持大簿書至案。偉人曰：「記得還李媪珠子事否？」郡君曰：「記之。」其一偉人曰：「當增二十年壽。」其一曰：「得無太多也？」其一曰：「婦人而不受珠寶，無貪得之心。此可尚也。」偉人即命還，復乘車至門首而入，見其尸卧帳中，驚而悟，起後二十年乃卒。

宋台中令應舉，屢不第。詣葫蘆生問命。生殊不許。後入安上門，見一婦人以新紫帕封裹一物，令女奴捧之。因在閤中，女奴力勸置門闌上。車馬駢集，婦人女奴忽相失，乃遺帕裹在闌傍。公為守護，至日晏竟不至。忽婦人蹣跚而來，公問之曰：「夫犯極刑，有能救護者，惟欲寶帶，今晨遺失，夫不免極刑矣。」公即以帶還之。婦人泣謝曰：「公秉心正直，不貪財如此，天地鬼神必監公之德，將大顯于時，以享厚報也。」遂再拜去。公明日又見葫蘆生，生曰：「秀才必種陰德，前程非某敢量也。來年果及第，後位極人臣。」





